



Proklamasyon Lakomin an 1871, divan Minisipalite Paris kot pu premye fwa dan listwar, travayer reysi met dibut enn guvernman dirize e kontrole par travayer, ek militan internasyonalis. Pandan trwa mwa, Mars a Me, Lakomin an etablier enn demokrasi direk, kot travayer ki desid tu ki lor lekonomi ubyin kuma pu zer lavil, kot ena korperasyon, plis egalite e liberte reyne. Lakomin ti reprime ek kraze par enn larme monte par dirizan ek burzwazi plizir pei Lerop.

INTERNASYONAL

LOSTRALI: Konferans Marxism 2014.....Paz.32

Lend: Ki Nuvo Guvernman B.I.P. reprezante?....Paz 33

Lareynon: Muvman Independantist BurzonePaz 34

Ikrenn: 70 an Kolaborasyon Nazi, Roi USA Iadan....Paz 35

IZRAEL: Test Nikleer an 1979, ki US gard Sekre: Prev deor zordi... Paz 37

EDITORIAL :

**SEKTER PRIVE PE TELEGID
LALYANS PTR-MMM**

PAZ 3

LALIT PROPOZ ENN


**“ROAD MAP LOR
DIEGO EK CHAGOS**

PAZ 24

KANPAYN KONT I.D. KARD:
LAVERITE DERYER KONTRA
PU I.D. KARD:
GRO LINTERE BIZNES
PAZ 16

**DOSYE REFORM
ELEKTORAL**

PAZ 5



KONTENI

No.114

Zin 2014 - Ziyet 2014

Editoryal: SEKTER PRIVE TELECID LALYANS PT-MMM.....	3
DOSYE REFORM ELEKTORAL	5
Eskrokri Intelektyel? Pena enn Vre Parlman Zordi	5
Fode pa Trok "tir Bes-Luzer" kont "Demokrasi".....	6
Parlman fode pa "Rubber-Stamp" pu Desizyon Kabine	6
Ranversman Rezilta apre FPTP: Laspe Danzere Propozisyon MMM-PT	7
Puvwar Lexekitif (Kabine) ek Puvwar Lezislativ (Parlman)	7
"Plan B": Danze ka Rezistans & Alternativ	8
ENN Reform Reaksyoner	9
"Aprofondisman Demokrasi" v/s Verbyaz Ramgoolam-Bérenger	9
Proze PT-MMM: Risk 80-0!	10
ENN Ku Ena Koz-Koze PT-MMM, Enn Ku Pena. Kifer?	10
Avan Sak Eleksyon Zeneral, Misyon Pro-Kapitalist Gllbert Ahnee	14
Fiksyon Politik: Konversasyon Telefonik Intersepte par C.I.A.	15
INFO INFO	15
KANPAYN KONT I.D. KARD	16
Laverite Deryer Kart I.D Kard ek Data-Base: Gro Lintere Biznes	16
Go-Slo Kontinye pu Nuvo Kart Idantite Biometrik: Skandal lor Sekirite Amater MNIS.....	17
Dan Sant Konversyon Nuvo Karti I.D.: Miz Angard LALIT a bann ofisye	17
Rapor Konferans de Pres Komite Kont Nuvo I.D. Kard	18
Dezyem Petisyon Lorganizasyon v/s I.D. Kard.....	19
Stop Pres: Clavis Primary School: Lanprint Dizital pu Prezans "illegal"	31
Sekter Prive Mont Ashok Subron kuma enn "Alternans"?	20
Problem Somaz ek Lozman pli Grav ki Sif Guvernman Indike	22
Rodrig: Problem Apre Dernye Vwayaz Mauritius Pride	22
Kanpayn Aksantye pu Ferm Baz Diego Garcia	23
LALIT Propoz Guvernman enn <i>Road Map</i> kont baz Diego	24
LALIT an Aksyon	26
Diskur Premye Me par Lindsey Collen: "Internasyonalism pa Nasionalism"	27
INTERNASYONAL	
LOSTRALI: Konferans Marxism 2014: Rada Kistnasamy prezant papye	32
LEND: Ki Nuvo Guvernman B.J.P. reprezante?	33
LAREYNON: Muvman Independantist Burzone	34
IKRENN: 70 Banane Kolaborasyon Nazi, Rol USA ladan	35
IZRAEL: Test Nikleer dan Losean Indyin an 1979, ki US gard Sekre: Prev deor zordi	37
PALESTINN: Lar Kont Miray Apartheid dan Palestinn	34
Jerry Leonide: Pyanist Exepsyonel	38
Jabaljas ek Bulbak	38

SEKTER PRIVE PE TELECID LALYANS PTr-MMM

Sa editorial la base lor trak ki LALIT ti distribiye an 8,000 kopi.

Kan Navin Ramgoolam ek Paul Bérenger pe rod fer lalyans, li kapav paret ki zot pe azir par zot prop volonte, antan ki individu lider zot parti politik. Me, zot pe fer sanblan. Zot pa pe ule devwal zot-mem kuma azan politik pu kapitalist. Me, zot samem. Veritab presyon pu enn koalisyoun ant sa “2 pli gran parti”, li anfet vinn depi lekonomi. Pli presizeman, li vini depi klas kapitalis. Kapitalist pe mem fer enn lagrev investisman pu fors Ramgoolam ek Bérenger mars ansam. Alor, tu sa kestyon politik kuma drwa poz kandida san deklar kominote, reform elektoral, 2yem Republik - tusala - zot pyon ki pe buze pu fasilit enn tel koalisyon.

LALIT, depi lontan, pe predir sa kriz ekonomik sistemik provoke par lafin proteksyon Lerop. Nu’nn osi predir ki patrona pu met presyon pu enn koalisyoun PT-MMM amezir sa kriz la morde. Nu finn konpran sa, pa atraver enn bul kristal, me atraver nu analiz Marxist lor realite Moris. Zordi, ala bann port-parol sekter prive vinn konfirm sa.

Presyon sekter prive

Tim Taylor, sef patron, lor nom klas kapitalis dan so lansanb, (*L’Express*, 30 Avril, 2014). dir dan enn intervyu:

R: “*Au niveau politique, je suis tenté de dire qu’une alliance entre le PTr et le MMM serait bénéfique au pays... pour permettre au pays de mieux faire face aux nombreux défis auxquels il est confronté actuellement, tant sur le plan économique que social.*”

Q: “Etes-vous en train de dire que le monde des affaires est favorable à une alliance PTr-MMM?”

R: “*Je pense que oui. Le secteur privé est favorable à une telle alliance.*”

Enn lot sef patron, Rajiv Servan-singh (*Le Défi Plus*, 17 Me) dir:

“La communauté des affaires aurait souhaité que le pays aille de l’avant avec la réforme électorale. Mon sentiment est que le secteur privé aurait souhaité une alliance PTr-MMM. Je peux vous assurer que tous ceux que je rencontre dans le monde des affaires sont presque unanimes à souhaiter une telle alliance si un tel mariage assure la stabilité politique et permet au gouvernement de prendre des mesures quelquefois peut-être impopulaires, pour l’avancement du pays dans un contexte économique difficile.”

Kan Tim Taylor dir “*pour permettre au pays de mieux faire face aux nombreux défis ... tant sur le plan économique que social*”, ek Rajiv Servan-singh koz “mesures quelquefois peut-être impopulaires”, ki zot ule dir, o-zis? Zot pe anfet viz pu fer klas travayer vinn sa klas sosyal ki sarye fardo kriz ekonomik la, pa zot prop klas, klas kapitalist.

E ki nu ule dir kan nu dir zot ule “fer klas travayer sarye fardo kriz”? Nu pe dir sekter prive ule lalyans PT-MMM pu fer travayer pey lepo kase pu kriz:

* Zot ule bes lapey reyel travayer, pu ki profi patron pa bese dan kriz.

* Zot ule kree plis somaz. Sa osi li pu bes saler travayer.

* Zot ule siprim pansyon kuma enn drwa universel, pu ki bidze

Guvernman sibvansyonn infrastruktir pu kapitalist.

* Zot ule fer swin medikal vinn peyan, pu ki kapitalis lib pu tir larzan ar publik atraver rulman lasirans, e atraver rulman klinik prive.

* Zot ule privatiz para-etatik, pu ki kapitalis prive kapav investi dan sa bann lantrepriz la e pey klas travayer mwins lapey ki Guvernman peye.

* Zot ule kontiyn bayant later pu IRS ek ERS.

* Zot ule kontiyn zot lindistri “kannyer” odetriman plant manze e prezerv prodwi alimanter.

Kifer patron ule enn Guvernman for?

Pu fer tusala, sekter prive dir, fode Guvernman “for”.

Ki zot ule dir kan zot dir enn Guvernman “for”?

Zot ule dir kareman dominer. Guvernman, dapre bann kapitalist, li bizin for parski li bizin kapav inpoz represyon pu fer travayer aksepte vinn pli mizer. Zot ule ki Guvernman ase for pu li kapav siprim drwa demokratik - ki deza byin minim dan reyn kapitalist: kuma drwa manifeste, drwa refiz travay (setadir fer lagrev), drwa fer politik aktiv, drwa kol lafis, drwa kritik Guvernman, drwa organize kont patrona.

La, ki sekter prive truv problem. Ramgoolam ek Bérenger, sakenn separeman, pa ase for, tusel, pu inpoz sa kalite represyon la. Setadir, si Travayis seye, kan MMM dan Lopozisyon, pu ena enn parti “tro for” andeor Guvernman, i.e. MMM.

Pareyman, si MMM vinn opuvwar san Travayist ansam, la osi pu ena enn parti “tro for” andeor Guvernman, dan Lopozisyon. Pu ki Guvernman ase “for”, e pu ki Lopozisyon ase “feb”, pu ki zot inpoz represyon lor lamas travayer, sekter prive kone ki fode ena enn lalyans PT ek MMM. Ala seki nu ule dir kan nu dir “fer travayer sarye fardo kriz ekonomik la”.

Koalisyon kuma an 1969?

Alor, Ramgoolam ek Bérenger, etan reprezantan lintere kapitalist, finn kennel zot miting Fet Travay, e zot pe kareman seymem fer enn koalisyon prokapitalist. Enn “koalisyon” se enn travay de-konser ant Guvernman e Lopozisyon san travers eleksyon zeneral ansam.

Me, li pa fasil pu PT ek MMM ni fer enn koalisyon, ni fer enn lalyans tukur. Pu 2 rezon:

Premyerman, gran mazorite popilasyon kont. Dimunn, dan zot sazes, fini konpran ki pe vini par deryer. Enn Guvernman “for” vedir sufrans, lamizer, gayn kraze. Sa term “koalisyon” fer rapel 1969 ar tu so represyon, alor Ramgoolam ek Bérenger zame servi sa term la pu seki zot pe tripote - malgre lefet ki li bel-e-byin enn koalisyon.


Dezyeman, PT ek MMM, antan ki parti, sakenn so kote, tro for politikman pu zot prop latrup aksepte zis lamwatye gato Guvernmantal.

Sa-mem 2 difikilte.

Lintere pei = lintere patrona!

Alor, Ramgoolam ek Bérenger pe bizin ena rekur a tu kalite trikmandaz pu fer publik ek zot prop manb aval sa lalyans PT-MMM la. Dabor, zot bizin koz “lintere siperyer di-pei”, kan zot pe anfet rod “lintere siperyer di-patrona”.

Answit, zot servi pretex “bizin enn mazorite 3/4”. Me, pu fer kwa? La, zot azut ti-brayb, gro-brayb, pel-mel dan zot “pakej” amandman konstitisyonel, pu sey brikol enn “konsansis” - ar maximem grup ki ase organize pu exprim enn lavwa kont.



Labwet ki kasyet lamson

Pu servi enn metafor pli kri: Ramgoolam ek Bérenger finn instal differan labwet, pu maske lamson sa koalisyon la, pu lak differan dimunn e,g:

* Pu kur an ex-UDM, sirtu otur lapres, Ramgoolam ek Bérenger garni lamson la ar enn doz proporsyonel.

* Pu grup Ashok Subron, labwet se drwa poz kandida san deklar kominote - pu kasyet lamson kriyel sa lalyans telegide par klas kapitalist.

* Pu bann Jack Bizlall, zot inn propoz 2yem Republik, Bizlall so dada, pu maske lamson.

* Pu manb PT, zot propoz enn Prezidan eli par sifraz iniversel, Ramgoolam so rev se pu vinn “sef deta”.

* Pu azan MMM, zot pe propoz enn Premye Minis Bérenger deswit apre eleksyon pu 5 an, rev Bérenger.

* Pu dimunn ki opoz Best Loser kominal, zot propoz tir li, mem si ranplas li ar enn mekanism anti-demokratik, setadir donn lider plis puvwar. E mem si anfet gard e etann laspe kominal sa 6 nominasyon la.

* Pu bann “kominote minoriter”, zot propoz gard Best Loser integre dan 6 syez proporsyonel, ki permet Lider “fer labalans”, mem lor baz nuvo “su-kominote”

ki pa ti kuver par ansyin Best Loser - kuma Bérenger finn devwale dan so diskur divan rasanbleman Varusha Pirappu - osi byin ki kominote dan Konstitisyon.

* Pu bann anti-transfiz, zot propoze ki enn lider pu kareman kapav kas syez transfiz la, dan ka enn depite proporsyonel - mem li o-detriman demokrasi.

* Pu bann ki kont “60-0”, zot pretann, mem li pa vre, ki zot reform pu anpes 60-0. La zordi, PT ek MMM ansam pe anfet viz enn veritab diktatir 60-0 anplas-anplas (swa 80-0). Avek zot barem 10%, zot pe rod elimin tu lezot parti depi Parlman.

* Pu bann ki pronn meritokrasi pa demokrasi, pu ena “nomini” ki pa mem prezante divan elektora. Alor nu pu gayn kuma depite e Minis, tu kalite ti-teknokrat elitist ki innyoran realite lavi kotidin lamas dimunn.

Alor, dan LALIT, nu kont sa koalisyon, sa lalyans, ant MMM ek Parti Travayist. Li telegide par sekter prive. Li pu amenn diktatir. E pli presizeman:

* Nu kont zot reform elektoral globalman. Li pu diminye demokrasi; li pu ogmant puvwar demezire lider parti - e sa, dan plizir fason. Propozisyon LALIT lor Reform Elektoral li lor nu say:

[http://www.lalitmauritius.org/
viewnews.php?id=1576](http://www.lalitmauritius.org/viewnews.php?id=1576)

* Nu kont sa manev pu gard Best Loser kominal dan enn fason apenn degize. Li riske pli pir ki Best Loser existan parski, enn kote, li pu tir puvwar depi elektora, met li dan lame lider politik e, lot kote, li pu etann best loser kominal a bann su-kominote ki pa ti kuver par Best Loser System. Li pu permet tu kalite santaz ek vyolans pandan kawnting.

* Nu kont sa “2yem Republik” la. Nu kont sa partaz puvwar a-la-Liban ant Prezidan ek Premye

Minis, avek tu so suzantand kominal.

* E, nu opoz sa lalyans PT-MMM akoz li pu permet enn atak san presedan kont klas travayer ek dimunn mizer. Li pu enn atak lor nivo de-vi fam ki ansarz zot fami, enn atak kont zanfan, kont pansiyoner, kont ti-planter ek ti-marsan, kont peser, kont zenn. Li enn lalyans ki burzwazi istorik ek burzwazi deta, ansam, pe dikte. Sekter prive pe fer enn lagrev investisman byin sever depi plizir lane, pu fors Labour ek MMM fer lalyans. Ramgoolam ek Bérenger inn zis servi Subron ek sa “pronouncement” Komite Drwa Imin Nasyon Zini, avek tu so menas enn nuvo resansman kominal, kuma pretex pu fer enn koalisyon anti-travayer. Nu, dan LALIT, nu pa tom dan sa kalite pyez la.

Vinn Zwenn LALIT

Parski LALIT konpran natir pro-kapitalist sa bann manev Ramgoolam ek Bérenger, nu finn evit pran nerport ki labwet politik, kote reform elektoral, 2yem Republik, etc. Epli importan ankor, nu pe kontiyen nu travay, ki selman LALIT pe fer, setadir pu chalennj lekonomi kapitalist, limem, par nu politik. Se lekonomi kapitalist ki alabaz tu problem sosyal ek politik ki dimunn pe sufer. Se sa ki bizin remet an-kestyon. Nu bizin u kudme. Kudme ki u kapav done. Dan tu nu kanpayn: kont kart idantite biometrik, anfaver lavansman tu dimunn ki travay pu viv, pu emansipasyon fam, pu enn lekonomi ki respekte lanvironnman, pu enn lalit internasional, pu retur Diego dan Republik Moris, pu ferm baz militer lor teritwar Moris, pu kree enn sosyete sosyalist.

20 Me, 2014

REFORM ELEKTORAL

ESKOKRI INTELEKTYEL? PENA ENN VRE “PARLMAN” MORIS

Ena enn gran eskrokri intelektyel ki derule Moris: dimunn pretann ena enn Parlman Moris, ena enn *Lezislatir*. Me, anfet na pena vreman okenn Parlman. Parlman Moris (Lasanble Nasyonal, setadir brans Lezislatir), li totalman domine par Premye Minis ek so Kabine ki li nome, setadir par brans Lexekitif.

Sa eskrokri la rann ridikil posisyon buku dimunn lor introdiksyon enn “doz proporsyonel”.

Preske zot tu, depi so MMM, ziska tu sa kuran UDM ki anfaver proporsyonel, ziska exper kuma Rama Sithanen, zot tu, zot donn kuma zot rezon kifer zot anfaver proporsyonel lefet ki *diferan kuran pu reysi reprezante pli ekitableman dan Lasanble Nasyonal*. Me, fode Lasanble Nasyonal *existe* pu sa argimantsyon la ena valer. Fode pa Parlman (Lezislatir) li pa zis enn “stamp” ki servi pu met lor desizyon ki Lexekitif pran.

Zis LALIT, otan ki nu kone, ki pe adres sa problem la dan nu propozisyon pu reform elektoral; nu adres li dan nu *White Paper*. Nu pe propoz, ant ot, pu ogmant nomb Depite ek, anmemtan, diminye nomb Minis ek PPS (*Lexekitif*). Pu gayn enn lide lor eskrokri intelektyel dan Moris, anu get sif pu UK. Ena enn 25-30 Minis parmi 650 depite dan Parlman UK (Lezislatir UK). Ala enn proporsyon vo lapenn gard an-tet kan nu get propozisyon PT-MMM.

Anu gete si *Propozisyon PT-MMM* li pu anfet kree enn veritab Parlman dan Moris pu premye fwa, ubyin non:

Anplas enn Lexekitif 35 (ubyin plis, kan azut bann wip) lor 70 depite, kuma asterla, PT-MMM pe propoze ki pu ena:

Parlman pu ena 62 (*First Past the Post*) + 14 (depi lor lalist anord pre-establi) + 6 (best loser kominal pu lider alwe depi enn lot lalist an ord alfabetik) = 82 Depite dan Parlman (dan Lezislatir).



Lexekitif pu ena 35 kuma avan. Me, get ki zot pe propoze: Tu depite lor “*lalist Proporsyonel*” ek lor “*Best Loser swazir par Lider*” ki alwe a parti ki finn rapport eleksyon (dizon li 10 depite), zot pu tom totalman su lanpriz Premye Minis, setadir su lanpriz Lexekitif. Si zot pa sumet divan Lexekitif, Premye Minis pu ena puvvar kareman kas zot kuma depite. Ala seki Navin Ramgoolam so *White Paper* dir: “*if a proportional representation MP chooses to cross the floor ... Government proposes that the next candidate on the party list should be appointed.*” Me, evidaman, li lider la ki pu kone sipa kikenn pe, pu ubyin finn “*cross the floor*”.

Anplas donn puvvar lelep pu revok depite ki transfiz, PT-MMM pe rod al donn plis puvvar Premye Minis pu li, li revok seki nome par proporsyonel, uswa Lider Lopozisyon la.

or, MMM ek PT pe ule perpetye sa eskrokri intelektyel ki pretann ena enn Parlman (enn Lezislatir) dan Moris, kan ena enn “rubber stamp” pu Lexekitif.

FODE PA TROK “TIR BES LUZER”

KONT “DEMOKRASI”

Plan Reform Elektoral ki Ramgoolam ek Bérenger pe tripote pa pu amenn okenn progre pu demokrasi. Zot plan reform, ki pe drafte par lekip ‘dream team’ avoka-exper, pe anfet donn ankor plis puvwar bann lider parti.

Dapre sa plan la, se lider Parti tusel ki pu kapav nom 6 dimunn, enn nomb alwe a diferan parti lor baz proporsyonel, *apre elekson* pu ranplas sistem Bes Luzer. Sa vedir si zot proze vote, sa pu donn bann lider, kuma zot mem, nuvo puvwar pu nom Bes Luzer olye ofisyen Komision Elektoral (ESC) fer li kuma dan sistem existan Bes Luzer.

Alor Ramgoolam ek Bérenger pe propoz pu ranplas enn mekanism ki repoz lor bann lexersis matematik ki ofisyen ESC fer ek sipervize e met swa la kareman dan lame lider parti. Se lider ki pu ena ful puvwar pu fer retablir enn balans ant diferan kominate dan Parlman. Lorla, avek enn tel reform mem bann su-kominote pu kapav rod reprezentasyon. Tu seki pe rant dan prosesi pu vot sa plan Reform Bérenger-Ramgoolam elektoral pe alafin kosyonn enn nuvo mekanism ki pu ogmant kominalism dan Moris e sirtu li pu amenn mwins demokrasi.

Ena mem sertin avoka dan kan ladrwat, kuma J. Panglose ek Y.Mohamed, ki pe sulev enn pwin konstitisyonel lor laspe anti-demokratik sa plan la. Dapre zot sa puvwar ki pu donn lider parti nom 6 Bes luzer li anti demokratik e donk li al alankont lartik 1 Konstitisyon ki dir “*Mauritius shall be a sovereign democratic State which shall be known as the Republic of Mauritius.*” E dapre lartik 47 (3) enn proze de lwa pu modifye sa lartik 1 pu kapav vote selman si li finn pas par enn referendum avan e kot li gayn vot ¾ elektora e lerla li vote par tu manb Parlman. Ala seki lartik 47 (3) dir: “*A bill for an Act of Parliament to alter the provisions of Section 1 or 57(2) shall not be passed by the Assembly unless - (a) the*

proposed bill has before its introduction in the Assembly been submitted, by referendum, to the electorate of Mauritius and has been approved by the votes of not less than three quarters of the electorate; (b) it is supported at the final voting in the Assembly by the votes of all the members of the Assembly.” Si Ramgoolam-Bérenger zot proze reform elektoral konteste divan Lakur zot pu bizin vinn defann kimanyer sa transfer puvwar pu swazir bes

luzer depi ESC a lider parti li pa anti-demokratik, e donk li pa reprezent enn sanzman dan sinifikasiyon Lartik 1.

LALIT finn deza exprim so dezakor ek sa kalite trok kominal anti-demokratik la. Nu anfaver reform sistem elekson ki vremem aprofondi demokrasi par ogmant puvwar elektora, enn kote, ek puvwar lezislatir (bann eli) par rapor a puvwar exsesif ki Lexekitif (Kabine) ena, sirtu sef Lexekitif, Premye Minis.

PARLMAN FODE PA “RUBBER STAMP” PU DESIZYON KABINE

Dan kontex deba lor reform elektoral, *LALIT* met buku lanfaz lor demand santral pu ranforsi demokrasi Parlmanter vizavi puvwar Lexekitif (Premye Minis ek so Kabine). Rezim Ramgoolam finn servi Parlman kuma *rubber stamp* pu dezisyon legzekitif pu inpoz bann lalwa ki viz pu atak drwa demokratik dimunn.

Ala 2 lexanp;

An 2009, kasyet dan *Finance Act* zis apre diskur bidze Rama Sithanen e ki abitye vote san deba, Ramgoolam finn fer Parlman pas amandman byin grav a *National Identity Act*, pu etablir Nuvo Kart Biometrik. Ala seki li dir: (2) *Every person who applies for an identity card shall – (a) produce his birth certificate or his certificate of registration or naturalisation as a citizen of Mauritius, as the case may be; (b) produce such other documents as the Registrar may require; (c) allow his fingerprints, and other biometric information about himself, to be taken and recorded; and (d) allow himself to be photographed, for the purpose of the identity card.*

Depite finn vot *Finance Act* (avek nuvo pri sigaret ek lalkol) e, san mem realize ki zot pe fer, finn vot enn atak kont drwa demokratik sitwayin.

An 2011, senn kut la avek lalwa *Local Government Act*, Ramgoolam finn vinn introdewir enn amandman lor deklarasyon aset bann eli (la, osi, an katimini). Lepok avan, deklarasyon aset tu depite ti fer divan Spiker Lasanble Nasional. Alor, li ti publik. Me, avek nuvo lalwa ki ti rantre an kasyet dan *Local Government Act*, deklarasyon aset fer divan ICAC. An sekre. Ankor enn fwa, nu truv lexanp kimanyer Lexekitif pe kareman aneantir puvwar bann eli dan Parlman.

RANVERSMAN REZILTA

LASPE DANZERE PROPOZISYON PT-MMM

Tu dimunn pu dakor ki li pu byen danzere si aplikasyon proporsyonel vinn sanz mazorite ki sorti depi lexersis tradisionel “*First Past the Post*”: si sa arive li pu deklans enn kriz sosyal ek politik ki kapav exploziv.

Dan metod pu partaz sa 20 syez proporsyonel apre rezilta FPTP, *White Paper* Ramgoolam aliyn limem lor propozisyon Sithanen pu servi seki apel *wasted votes*, setadir partaz syez proporsyonel lor baz pursantaz vot total ki sak parti finn resevar pu tu so kandida ki **pa** finn eli. Pa pu ena enn vot separate pu sak parti. Dan sa lexersis la, zis bann parti ki finn gayn plis ki 10% vot o-nivo nasional pu pran an konsiderasyon.

Dan Moris ena sirkonskripsyon ki ena enn nomb elektor byen differan: 10 pli gran sirkonskripsyon regrup 58% elektora, tandi ki lezot 10 pli tipti regrup 42%. Alor si dan eleksyon, enn parti (**A**) perdi eleksyon dan gran sirkonskripsyon, so pursantaz vot gaspiye (*wasted votes*) pu byen gran par rapor a lot parti (**B**) ki perdi dan ti sirkonskripsyon. Alor si parti (**A**) perdi eleksyon FPTP par enn ti marz, li kapav gayn plis syez proporsyonel ek devans parti (**B**) ki ti divan apre FPTP. Nu finn fer kalkil la pu enn eleksyon imaziner, ek nu finn truve ki li tutafe posib pu sa sistem kalkil syez proporsyonel vinn ranvers rezilta enn eleksyon, si diferans syez apre FPTP ase sere. Alor sistem la bizin inklir enn mekanism ki anpes sa arive.

Dan sistem *Best Loser* aktyel, ena so laspe kominal ki inaksepat; me ena osi enn mekanism ki viz pu mintenir lekar ki ena ant bann parti apre ki finn kont vot dan Kawnting. Dan 8 Best Loser, premye 4 nome lor enn baz pirman kominal, me pu dezyem 4, pran an konsiderasyon parti osi

byen ki kominate, pu ki lekar ant parti ki finn sorti premye apre kawnting e lezot parti, li mintenir. Alor li pa posib ranvers rezilta eleksyon par nom Best Loser.

Sa lekip ki an sarz pilot draftaz lalwa pu nuvo sistem elektoral sipoze vizilan pu ki pena lefe

imprevizib (*unintended effects*) dan nuvo lalwa: alor li swetab ki zot pran an konsiderasyon danze ki ena posibilite ki nominasyon depite lalist proporsyonel vinn ranvers rezilta apre kawnting FPTP.

PUWWAR LEXEKITIF (KABINE) EK PUVWAR LEZISLATIF (PARLMAN)

Enn definisyon “demokrasi” pli presi ki lezot se “kontrol lepep lor lezekitif”. Kan elektor al vote dan eleksyon zeneral, zot vot depite dan 21 sirkonskripsiyan. Depite eli form parlman (puwwar lezislatif, setadir “lezislatir”). Depite reprezent elektor. Elektor finn donn li puwwar koz pu li.

Sa vedir, kan byin gete, ena 2 fason pu elektor kontrol lezekitif:

- Revokasyon depite par enn petisyon elektoral siyne par elektor sirkonskripsiyan. Pena Moris. *LALIT* pe propoz introdir li.
- Kontrol ki nu donn Lezislatir (nu bann eli dan Parlman) pu kontrol Premye Minis (ki Prezidan nome, aktyelman, mem sa li pa demokratik) e pu kontrol Kabine (ki Premye Minis nome, aktyelman, mem sa li osi li pa demokratik). Isi dan Moris, sa kontrol la li enn gran blef. Li non-existant.

Dan Moris, Kabine kapav ena ziska 25 Minis lor enn parlman 70 depite. Anterm proporsyon sa reprezent 1 minis pu sak 1.8 depite ki pa Minis. Eski sa normal dan sistem Westminster, uswa li enn abominasyon de sistem Westminster?

Dan UK, bero Westminster, Kabine ena 22 minis aktyelman lor enn parlman 650 depite. Sa reprezent 1 minis pu sak 28.5 depite.

Setadir, dan UK Premye Minis, ek so kabine, li su enn sertin degré kontrol bann depite eli (Parlman, Lezislatir.) Resaman, kan Obama, Hollande ek Cameron ti pe fite pu intervenir militerman dan Lasiri, Cameron ti tom an minorite dan Parlman. Alor, lepep Grand Bretayn atraver zot eli (atraver Parlman, depite, Lezislatir tusala mem instans) finn reysi anpes sa agresyon la.

Par kont, dan Moris, sa 25 Minis la, plis sa 10 PPS, azut Whip ek so asistan, zot oblize swiv modord Premye Minis. E zot enn mazorite! Sankont Nita Deerpalsing, etc, ki gayn enn lamone anplis pu pran sarz “Komisyon Demokratizasyon Lekonomi”. Setadir, pena Lezislatir dan Moris, propreman parlan. Li grav. Bizin adres sa problem la.



Extre desin Escher "Zwazo ek Pwason"

"PLAN B": DANZE KA REZISTANS & ALTERNATIV

Rezistans ek Alternativ (RA) so aksyon legal kont *Best Loser System* (BLS) ti konport buku danze depi so kumansman an 2004. Zordi, dan deba lor reform elektoral, bann danze pe vinn kler.

Kiltir Regretab: Servi Dub Langaz

Li paret par zot diskors publik ki RA pe konteste BLS. Anfet, pu donn zot kredi, zot reyelman anvi konteste li. Me zot taktik legal malonet fer zot *pa* konteste BLS. Anfet zot finn mem al zir enn afidavit su serman lor nom sa 93 kandida (Blok 104!) ki pa finn deklar zot kominate lor Nomination Paper, pu dir ki zot *pa* pe konteste BLS. Sa malonete reprezant osi enn febles. Sa febles la ki zordi pe permet rekiperasyon sa long lalit kont Best Loser kominal depi 1982, 1983, 1987, 2000 ek 2005 vini mem, par bann lafors stati ko.

Setadir, bann RA ti ena enn diskors publik ek enn lot diskors dan zot bann ka legal, ki sa osi publik, kan byin gete. Sa dub langaz la, li evidaman expoze kler e net dan zizman Lakur, ziska Privy Council finn exposé sa. E pareyman, pronawnsmennt Komite Nasyon Zini Drwa Imin. Dan tu zizman, li ti vinn kler ki seki zot ti pe konteste legalman pa ti BLS, me selman nesesite klasifye kandida. A sak letap, RA finn anmemtan rasir bann Ziz ki Best Loser System pu kontinye parey, mem si zot pa deklar zot kominate. Dayer, seki drol, se tu lezot parti politik apar LALIT, tu zurnalis dan pei, pa finn remarke ki Zizman Balancy ki RA dir enn "*page d'or*" ti deza permet BLS kontinye bel-e-byin, sanki kandida RA deklar kominate. Yousouf Mohamed ti byin dakor ek Zizman Balancy, e limem gran defanser BLS.

Navin Ramgoolam, kanta li, ule gard Best Loser kominal me sanki kandida bizin klasifye limem. Depi lontan li pe dir sa. Li pe swiv mem sema, parey kuma RA. E li osi, li servi dub langaz, parey. E tu komantater permet zot "*get away with it*". Dayer, sa ti pozisyon Paul Béren-ger, depi kan li ti Premye Minis, lepok Zizman Balancy.

BLS degize

Navin Ramgoolam zordi pe dir li pa pe tir Best Loser System. Alor, ki li pe vinn propoze? Li pe propoz enn dezyem lalis proporsyonel, 6 dimunn nome par bann lider parti. Ondire lider parti dan rol konstitutionnel pu fer sa-mem zar balans ki BLS ti fer, zot-mem. Me, kote BLS, li ti enn mekanis aritmetik. La, li donn ankor plis puvwar Premye Minis ek Lider Loposyon, ki deza ena puvwar demezire lor zot trup. Alor, Ramgoolam pe tir laspe kominal institutionalize vizib, fer li *institutionalize me invizib*, e sa, odetiman demokrasi. Alor, maledezman li odetiman demo-krasi, dan lesans ki lider parti ki pu swazir despite, pa vot elektora dan enn sistem obzektiv. Li malere pu pey enn tel pri. Sa pri la li ot, kan nu kone ki sa kalite "nominasyon" la, li ena tandans favoriz bayer-de-fon kominal.

Pli kominal ki ansyin BLS

Kan Ramgoolam pe permet sa manev pu gard Best Loser kominal dan enn fason apenn degize, e pa ditu transparan, li riske pli pir ki Best Loser existan dan enn lot sans. Li pu etann best loser kominal a bann su kominate ki pa ti kuver par Best Loser System avan. Dayer, Bérenger fini kumans koronp dimunn dan enn rasanbleman Varusha Pirappu, ar lof su sa nuvo sistem BLS opak la.

Menas Nuvo resansman

RA so ka divan Komite Nasyon Zini finn al uver enn posibilite pli grav ankor. Sa zizman la finn anfet dir bizin fer enn nuvo resansman kominal, si kontinye exziz ki deklar kominate kan poz kandida. Sa demars la konport grav danze kas popilasyon an but-but. Deza finn kumans tann lavva lider kominal ki pe koz anfaver enn nuvo resansman ek divizyon ek su-divizyon kominal.

Sa vedir, sa 10 banane depi 2004, RA finn konstaman fer rekil dan lalit anti kominal. E sa, zot fer li malgre ki li pa zot bi. Me, kan u al zir bann afidavit su serman, u evidaman provok tu kalite lefe ki pa dan u bi. E u pe fer li su serman, setadir, an konesans di-koz.

Enn taktik bizin amenn u pli pre kot u bi stratezik. Li pa kapav al dan lot sans net. Se exakteman seki pu arive si tu deba lor reform elektoral fini avek enn bil dan Parlman ki pa gayn mazorite $\frac{3}{4}$, enn koalisyon PTr-MMM, enn lalyans PTr-MMM ek enn amandman pu ranplas "*shall*" par "*may*" pu permet Rezistans pa met kominate lor zot nominasyon paper.

SEKI riske arive, seki rezulta zot taktik pu al fini par akomod enn espas akote sistem Best Loser e riske vinn enn konsolidasyon BLS.

Lamas dimunn zordi pe kumans konpran ki enn taktik pa sifi pu amenn enn veritab reform elektoral kot ena plis demokrasi e kot pena nesesite klasifye kandida despite. Sa konpreansyon, sa li enn travay dir. Me, samem ki defi divan enn vre parti sosyalist revolisyoner.

ENN REFORM REAKSYONER!

Laplipar ditan *Rezistans ek Alternativ (RA)* kareman sutenir reform elektoral Ramgoolam. Mem avan zot kone ki ena ladan. Zot finn mem fer kanpayn pu ki sa proze reform la gayn ¾ mazorite dan Parlman.

Argiman RA lor sa re-form la se li pu sanse vedir enn “viktwar” kont sistem bestluzer kominal. Selman, kan get reform elektoral Ramgoolam-Bérenger an profonder, li riske pli pir ki sistem elektoral existan.

Premyerman, sa 6 syez proporsyonel ki viz gard *Best Loser System*, li riske *ogmant* kominalism kan lider parti (Premye Minis ek Lider Lopozisyon) gayn puvvar pu deside ki dimunn lor lalis proporsyonel zot pu nome kom depite. Deza pu selebrasyon Varusha Pirappu, Bérenger ti fini kumans dir ki reform elektoral pu fer plas pu nuvo reprezantan su-kominote ki pa ti gayn reprezante dan sistem bestluzer.

Fini truve ki pu ena enn sityasyon danzere zis kuma kawnting fini: pu sirman ena forsing de tu bor vizavi Premye Minis ek lider lopozisyon nom reprezantan depi tel kominote u tel karst kom depite lor lalis proporsyonel.

Dezyeman, reform elektoral Ramgoolam-Bérenger pu diminje demokrasi ankor plis kan Premye Minis/lider Lopozisyon gayn ankor plis puvvar pu nom depite de zot swa depi lor lalist ki zot finn prezant Komisyen Elektoral. Li pa elektora ki pu elir depite: se Premye Minis/lider parti ki pu nome. Alor reform elektoral Ramgoolam pu ranforsi puvvar Premye Minis ankor plis dan enn moman kot tu dimunn pe realize ki Premye Minis ena tro buku puvvar par rapor a Parlman ek elektora.

Alor pa zis reform elektoral Ramgoolam-Bérenger riske amplifye kominalism a tu kalite nivo, me li osi enn reform ki pu

diminje sa tigit demokrasi existan. RA finn redwir problem sistem bestluzer a ekzizans pu “deklar kominote lor form kandidatir (*Nomination Paper*)”. A enn tel pwin ki li permet Ramgoolam ek Bérenger pretann zot reform pu amenn enn gran progre demokratik ek anti-kominal, kan anfet li riske ogmant kominalism ek pu diminje demokrasi. Bérenger pe mem kapav propoz ki sanz lalwa (tir enn sel mo “shall” ek ranplas li par enn lot mo “may”) pu gard sistem bestluzer anplas ziska enn

reform elektoral plitar, me tir exizans pu kandida mark kominote lor *Nomination Paper!*

Ala kifer LALIT met lanfaz lor nesesite, kan pe aboli sistem bestluzer kominal, pu fer li dan kad enn kanpayn *politik* pu enn reform elektoral ki *ogmant* demokrasi ammemtan ki diminje kominalism. E, pu maximem dimunn dan pei konpran seki pe arive. Kanpayn RA ek zot “dub langaz” finn plito ogmant konfizyon.

“APROFONDISMAN DEMOKRASI”

v/s.

VERBYAZ RAMGOOLAM-BÉRENGER

Kan LALIT ti tir so *White Paper*, deswit Ramgoolam – ki ti’nn tarde enn banane – inn tir pu li. E osito LALIT finn introdir konsep “aprofondisman demokrasi” kuma bi nerport ki veritab reform elektoral, Ramgoolam ek Bérenger, tulde, inn kumans dir sa zot bi, zot osi. Me, selman pu zot, li selman o-nivo verbyaz.

Definisyon pli itil “demokrasi”, kan nu byin gete, se kontrol par “demos” (lepep, totalite popilasyon) lor Lexekitif (Premye Minis, Kabine, Lapolis, etc) enn pei.

E pli gran defisyans demokrasi Moris se mank kontrol popiler lor Lexekitif, an partikilye lor Premye Minis.

Pa zis nu ki pe dir sa. Tu dimunn pleyne ki Premye Minis, sef Lexekitif, ena tro buku puvvar. Alor, anplas *aprofondi demokrasi* par permet elektoral gayn kontrol lor Lexekitif, PT-MMM pe vinn delavan avek enn “2yem Republik” bankal kot Premye Minis partaz so puvvar pa avek lepep, pa avek Lezislatur (reprezantan lepep dan Parlman), me avek ... Prezidan Republik.

Dan LALIT, nu propoze ki ena 2 kalite kontrol par elektoral lor *Lexekitif* (setadir lor Premye Minis ek so Kabine):

* Kontrol direk atraver enn sistem revokasyon depite par petisyon elektoral formel (kuma ena dan tu Lasosyasyon ek sindika Moris).

* Kontrol indirek atraver agrandi nomb Depite dan Parlman, setadir agrandi *Lezislatur*, relativ a Kabine (ki kapav redwir buku). Nu propoz fer 4 depite eli par sirkonskripsyon plis 20 proporsyonel. (E fode pa sa 20 depite proporsyonel la ni nome, ni ranplase kuma depite par lider parti politik, kuma PT-MMM pe propoze.)



PROZE PT-MMM RISK 80-0

Travayis ek MMM, tulde, zot pa ditu dakor ek rezulta 60-0. Alor, zot met argiman ki sa proporsyonel ki zot pe propoze, li pu anpes fenomenn 60-0. Eski li vre ki zot propozisyon pu anpes 60-0?

Sipoze zordi an 2014, enn lalyans PT-MMM forme deswit, met zot masinnri elektoral byin for amars, avek Leta dan zot lame, zot ena buku sans ranport enn 60-0 dan *First Past the Post*. Dizon MSM pa reysi gayn enn gran lelan, pa reysi rekolte plis ki 10% – mem avek PMSD, PAL, Cehl Meeah, enn-de dimunn MMM ek PT, ar li, pu kalifye pu proporsyonel.

Lerla pa pu ena okenn lot parti ki pu gayn depite par Proporsyonel kuma PT-MMM pe propoze. Ki zot ena lintansyon fer, li pankor kler. Eski PT-MMM pu truv so 20 Depite Proporsyonel dan Parlman?

Si wi, anplas 60-0 pu ena 80-0.

Dosye lor Reform Elektoral prepare par:

Rajni Lallah, Alain Ah-Vee, Rada Kistnasamy, Lindsey Collen, Kisna Kistnasamy, Ram Seegobin.



Desin Chana Orloff, Fam per reflesi

ENN KU ENA KOZ-KOZE PTR-MMM, ENN KU PENA. KIFER?

par Lindsey Collen
tradir par Vijay N.

LALIT ti reyni so manb Dimans le 27 Avril pu nu tu kapav konpran sa bann zigzag politik ki pe ena dan pei depi le 17 Avril, kan Premye Minis Ramgoolam ti zwenn lider lopozisyon Bérenger.

Ala enn lartik baze lor introduksyon dan lasanble LALIT ki Lindsey Collen ti fer lor sitiasyon politik ek lor diskisyon enn-ertan ki ti ena apre.

Ki finn arive?

Kumadir sap depi lesyel, Ramgoolam ek Bérenger zwenn enn premye fwa dan Clarisse House Zedi 17 Avril. Diskisyon dire 3 zertan. Lapres grupe andeor pu aprann ki finn deside.

Deswit Ramgoolam anonse:

- Miting Travayis ki ti pu ena dan kinz zur e ki finn anonse par lafis partu-partu inn kennnsel anplas.
- Li anonse ki miting MMM ki ti pu ena le 1 Me finn usi kennsel, mem si lafis inn fimi kole e bandrol pe flote dan ler pu anons miting *Re-Make* dan Port-Louis.
- Parlman an konze ziska 13 Me.

- Li dir osi ki li ek Bérenger finn arriv a ‘linanimite’ lor reform elektoral. Ena enn Bill (proze de Iwa), ki ti pe deza prepare, ki pu prezante dan Lasanble Nasyonal, kot pu bizin gayn enn mazorite $\frac{3}{4}$, o pli vit.

- Zot ti diskit kestyon 2yem Repiblik preske ful trwa zertan; lor la osi ti ena buku lakovite.

- Zot ti diskit ‘plan davenir’- Ramgoolam dir an-repons a enn kestyon lor enn prosenn lalyans avek MMM. Klerman li ti pe koz enn lalyans Ptr-MMM otur enn proze 2eme Repiblik, ki pu prezante divan elektora byinto.

Bien vit Bérenger konfirm tusa.

Reaksyon LALIT

Deswit LALIT anonse ki li pa pu sumet okenn papye a Premye

Minis lor reform elektoral, parsaki li ti kler ki pa ti pu ena enn deba nasyonal, parsaki tu inn fini tom dakor a ‘linanimite’! Sa deba nasyonal ti pu zis enn sinema pu fer pas Ramgoolam ek Bérenger zot swaf puwar. Me de tut fason li ti kler kuma dilo ki sa ‘White Paper’ pa ti enn ‘White Paper’ me enn sinema kot enn sel dimunn ena rol, enn ‘Ramgoolam Paper’ ki mem Kabine pa ti okuran, so parti pa ti okuran, so bann alye pa ti mem okuran. Nu ti osi fer konpran ki nu pa ti dakor ek prinsip pu elarzi sistem ‘Best Loser’ pu rod enklir bann su-kominote, plis nu pa dakor ki lider parti politik swazir depite. (Get 2 lartik lor nu web-sayt: ‘White Paper’ LALIT, ek lartik su tit: ‘LALIT refiz sumet so dokiman lor Reform Elektoral pu Teat Ramgoolam’).

Ala reaksyon MMM ki Bérenger pa ti atann ditu

Bérenger ti panse kumadir li mem MMM. Stil Napoleon kan li dir: “*L'etat c'est moi!*”: ‘MMM, mo mem sa’. Li pa ti panse ki manb MMM ek siporter pu ankoler (e zot ti ena rezon ankoler). Li pa ti atann zot pu zur li, apel li enn tret ek vander Pa zis dan Rose-Hill, me osi dan Plaisance, Riviere Noire, No 4, Britannia, Quatre Bornes, Montayn Long, e lor sit travay enpe partu. Anfet negatif partu. Bérenger pa ti predir ki so de gran alye dan lapres, Josie Lebrasse ek Raj Meetarbhani ti pu denons so oportinism kare-kare. Li pa ti predir ki enn so bann ‘Deputy Leaders’, Ivan Collendavelloo, sa mem bug ki ti responsab dosye ‘Reform Elektoral’ dan MMM, ti pu, avek rezon, demisyone depi tu pos de responsabilite dan MMM. Finalman, Bérenger gayn so ku

kan so prop bodigard, sa bug ki ti pe dibute akote Bérenger kan li ti pe met ar bann manb MMM ki ti apel li ‘vander’, finn inplike dan enn kafuyaz parmi bownnser/bodigard, kot finn tuy enn zennom kut-bal abu-portan. E sa zenom la ti anfet prezant dan enn Kongre PT mem granmatin. Bérenger pa ti prevwar ki sertin Komite Rezyonal MMM pu kontinye marye-pike ek manb MSM.

Reaksyon Ramgoolam pa atann

Ramgoolam finn azir defason otokratik, li osi, parey kuma Bérenger ti fer, ‘*Labour c'est moi!*’ Li finn inkapab pu predir ki so bann muv brit-brit pu enn lalyans avek MMM pu destabiliz so prop Guvernman deza byen frazil ek afebli avek enn mazorite byen feb. Depi enn-de-zan li ti pe kumans dir li pa fer konfyans ‘okenn so Minis’ e ti ena bann ‘Judas’ parmi zot. Malgre tusa, Ramgoolam pa ti prevwar ki azan Minis pu kumans mobilize: ti ena bandrol inn plase dan sirkons-kripsyone No 2 dan Port-Louis ki dir, ‘*Pa tus nu VPM*’. Lezot bandrol dir, ‘*Arvin nu lider*’, kuma dir Ramgoolam inn fini retruv li dan rol Prezidan e pe vinn ‘apolitik’ vit-vit, e les deryer li enn plas lider Parti Travayis vakan. Ramgoolam ti bliye ki li ena zis 29 vot PT dan Lasanble Nasyonal lor 69, plis 3 depite depi PMSD, plis Sik Yuen (ki li drol li enn Minis san ki li ena enn parti). Si azut MMM so 19 vot ar sa (29+3+1) lerla li pu selman 52 vot, sif ki bizin pu gayn mazorite $\frac{3}{4}$ pu fer pas reform elektoral. Sa vedir ki enn ti grup 2-3 disidan rekalsitran kapab ranvers li. U kapav normalman kont lor 2-3 disidan pu lev latet dan sa kalite moman-la!

Ramgoolam pa finn futi predir nonpli ki bann kominalis *Voice of Hindu* ti pu mobilize pu le 1^{er} Me, sirman kuma enn reaksyon a sa lalyans ki ti pe vini avek MMM.

Ramgoolam pa finn futi predir nonpli ki kafuyaz parmi bann bownnser/bodigard pu vinn

andeor kontrol a-tel pwin ki enn so bann azan PT dan St Pierre pu al perdi so garson, kan enn band zom inn vinn dan senk sis loto an plen lizur, inn tir kut bal, e prinsipal sispe ladan se Bérenger so bodigard personel.

Enn semenn apre, met aryer lor vites

Sa kalite instabilite fer ki Ramgoolam ek Bérenger zwenn enn dezyem fwa enn semenn apre, tuzur dan Clarisse House. Reynon inn dire dezertan sann fwa la. Li paret kler parlaswit ki Ramgoolam ek Bérenger finn tom dakor pu kalme bann zafer pli vit ki kapav.

Ramgoolam fer sa deklarasyon la apre:

- Li pena lintansyon amenn enn Bill lor reform elektoral dan Parlman avan eleksyon zeneral; li dir komkwa bizen enn prosesis demokratik avan.
- Ena enn gran diferans ant PT ek MMM lor kestyion Dezyem Repiblik.
- Bizen atann eleksyon selman an 2015.
- Li explike klerman ki pena okenn lalyans avek MMM pe vini, e pena osi okenn ‘lintansyon pu lavenir’.

E lerla Bérenger anonse li pu arret tu negosyasyon ‘definitiveman’.

Sertenman sa finn kalme bann zafer. E samem ki tulede, Ramgoolam ek Bérenger, ti pe rode, apre zot Deziem Reynon dan Clarisse House.

Tulede lider inn pas dan mari sok, e zot inn sorti mari afebli. Bérenger so sityasyon pli pir ki pu Ramgoolam, kitfwa parski pandan 2 banane Ramgoolam finn flat Bérenger e finn kritik so alye, bann Jugnauth, alor ler anons enn lalyans lor vites ar MMM, li pa ti sa kantite enn sok pu bann ferm Travayis. Tandi ki pu Bérenger, ki finn kas disik lor latet Jugnauth enn semenn avan, anmemtan abes Ramgoolam, kan li, li anons enn lalyans ar PT, sa li enn move sok pu manb so parti.

Enn lanaliz lezot kuran politik

PMSD ek MSM inn zwe enn rol efase parey kuma bann parti dan Rodrigues, e Guimbeau parey. PAL inn dir donn kudme MSM. Cehl Meeah inn koz an parabol. A. Subron inn revandik respekte UN Human Rights Committee ek Lakur Siprem, fors bann parti politik opuvwar pu amand Konstitisyon pu kapav anlev obligasyon pu deklar enn kandida so kominote lor Nomination Paper.

Pandan sa letan la tu kalite dimunn – komantater, aktivis, lamas dimunn - vinn sinik, e lerla sa vinn danzere parski sa kapav fer simen pu bann lafors reaksyoner ek mem fasist gayn terin.

Purtan lezot, sirtu bann komantater politik ek de-trwa zurnalis finn telman fiks zot lespri lor ‘reform elektoral’ ki kumadir zot pa interese ditu ek lezot zafer. Pu zot, pa bizen kas latet lor ki simen politik danzere nu pe anbark nu, tu korek osi lontan ki ena reform elektoral. Sa bann dimunn la inkilir restan kuran UDM ki ti met reprezentasyon proporsyonel kumadir enn parol levanzil. Aswar-lizur zot met presyon lor Ramgoolam ek Bérenger pu amenn reprezantasyon proporsyonel, e sa kapav gayne selman si PT ek MMM vinn ansam pu fer enn mazorite trwa kar; alor, sa lerla li otomatikman provok negosyasyon pu ariv $\frac{3}{4}$ la. Lerla, kan ena negosyasyon, sa bann anfaver proporsyonel, zot gele kan Ramgoolam ek Bérenger kumans tom dakor. Sa laliyn la fer konpran ki, si klerman zot an faver reprezentasyon proporsyonel, zot pa’le ki gayn sa a nenport ki pri.

Ena enn lot ti-grup dimunn ki na pa ena lespri fiks lor ‘reform elektoral’ *dan so totalite*, me lor enn sel pwin: bizen ena enn resansman kominal pu ki Best Loser System res kuma li ete, e anmemtan Leta respekte komanter UN Human Rights Committee. Sa pozisyon la pe met an-avan par bann reaksyoner, kuma Yousouf Mohamed.

Malerezman sa kalite kuran riske ‘gayne’, parski li reprezant stati ko, e tu leres kuran na pa pe reysi progrese; alor seki ti deza ena, li reste.

Tusala pu dir ki reform elektoral ena buku implikasyon, e akoz sa, li partikilyerman importan ki nu tuzur integ, koz laverite, pa indwir dimunn an-erer, ni koz manti.

Ena ankor enn lot ti-kuran, ki benefisyen bel kudme lapres, ki pe ule fors enn amandman pu ki kandida dan eleksyon zeneral pa bizen deklar zot kominate lor Nomination Paper (Askok Subron & Co). Zot paret pe kriye ‘Viktwar’ mem si integre Best Loser System dan proze Ramgoolam-Bérenger lor reform elektoral, zis parski kandida na pa pu oblige deklar zot kominate. Zot paret pa kas latet, mem si anfet BLS pu vinn pir parski enn nuvo espes su-kominalism pu institutionalize, bann lider parti pu su presyon depi bann kars ek tu kalite tipti-tipti kominate. Saki osi grav ankor se zot na pa truv danze ki pei pu divize lor enn baz kominal ant de lider ki partaz puvwar (kuma ena dan Liban) ant enn Prezidan ek enn Premye Minis ki reprezant sakenn enn kominate. Li grav an li-mem, apar lefet ki sa bann propozisyon innyor enn lot kominate kuma dir li pa existe.

Sa kuran otur Ashok Subron finn pyeze par Ramgoolam dan enn pozisyon mike ki prefer enn sanzman politik inpoze par enn komite UN (ki fodre pa nu blye pe demann enn lot resansman kominal kuma enn so bann rekomandasyon) dan plas enn deba nasyonal ek enn desizyon demokratik. Me se zot mem ki a blame: tu zot stratezi baze lor koz manti. Su serman, zot dir ki zot ka legal na pa pu zenn *Best Loser System* dan okenn fason, me an mem tan zot pas pu bann ero nasyonal ki ti pe atak BLS! Me saki finn arive seki zot mansonz finn permet Ramgoolam ek Bérenger kontiyn mem mansonz, e vinn de lavan avek enn

propozisyon pu integre enn BLS pli pir ki deza ena, anmemtan ki anlev obligasyon pu deklar ki kominate u ete kuma *Rezistans* pe dimande. Lor la, propozisyon PTr-MMM pu anfet anlev enpe puvwar elektora, parski se lider parti ki pu deside – si reform Ramgoolam-Bérenger al de lavan – olye ki ena enn formil matematik kan fer kontabilite bann vot, kuma ansyin BLS. Ala kimanyer demokrasi riske akiz enn ku. Sa kuran politik ‘singul isyu’ ki pe fer presyon lor Ramgoolam-Bérenger bizen konpran ki aret obliz kandida deklar kominate na pa kapav fer a nenport ki pri.

Alor, kuma nu finn truve, enn kote ena sinism, de lot kote ena malonete, u alor revandikasyon aveg lor enn sel isyu e a nenport ki pri. Sa mem kifer politik reaksyoner vinn pli for.

Onk sa ki plis kupab lor sa kafuyaz ki pe ena partu se bann lider de bann gran parti politik. Me, dimunn kuma ladireksyon RA, li osi, li responsab pu etidy lefe ki so revandikasyon ena lor sa bann lider, e zot ena devwar azir aveg integrite, e evit malonete kuma al fer serman mansonzer.

Burzwazi deryer tusala

Klerman, burzwazi Moris finn ase tarde pu realize ki lakriz ekonomik pe tap plin lor Moris asterla. Me la, zot ule asire ki se pa zot-mem, klas kapitalist, ki sarye fardo sa kriz la, me ki se klas travayer ki pey lepo kase. Alor li sir-ek-sertin ki zot anvi truv sa 2 pli gran parti, MMM ek PT, ki ti ena zot rasinn dan klas travayer, kup rasinn ar klas travayer definitivman. Alor, premye viktwar pu kapitalist se kan zot reysi fer MMM ek PT finalman kennel zot Miting Premye Me anyel. Zot ankor res pu fors enn lalyans MMM ek PT. Zot ule sa lalyans la pu ki sa 2 parti la kapav partaz inpopilarite kan zot fer klas travayer pey lepo kase pu sa kriz la.

Donk patrona pe fer gro presyon:

- Patrona ti ule ki PT ek MMM kennel zot rali anyel le 1 Me, kifer? Se dan sa lokazyon la ki Ptr ek MMM fer promes ar klas travayer. Burzwazi finn reysi fer zot kennel zot miting uvriyer. Avan sa, dayer buku sindikalist finn uver sime pu li posib zot kennel zot miting: zot finn dir fode kit Fet Travay lib pu sindika fer rasanbleman.

- Patrona ule ki ena enn espes Reprezantasyon Proporsyonel pu ki kapav anpes laklas travayer gayn 60-0 dan lavenir, letan ki li vinn pli for. Dan sa demars la zot finn gayn kudme bann ex-UDM kuma zot bann alye pli for. Kan u gete sa ki Ramgoolam-Bérenger inn propoze pretann li donn garanti kont enn 60-0, me li na pa donn sa garanti la ditu.

- Patrona ule ki MMM ek PT, tulde, dan Guvernman, pu ki pena ni enn ni lot la andeor, pe ‘fer dezord’. Ramgoolam ek Bérenger inn seye ariv a enn akor, me pa finn reysi ziska ler.

- Patrona ule ki PT pez fren lor so swadizan ‘demokratizasyon lekonomi’, setadir donn kontra ek enn lespas ekonomik a bann kapitalis mwayin pu ki zot kapav elarzi burzwazi so baz sosyal.

Burzwazi inn fini kumans enn ‘lagrev investisman’. Sa se anparti ki vedir ‘exes likidite’. Sa lagrev la explike kuma burzwazi pe al investi dan Madagascar, Cote d’Ivoire, Mozambique, Bangladesh, la Chine, Uganda, Tanzanie, ... e pe refiz investir dan Mauritius. Ek isi dan Mauritius, sel investisman ki nn asir inpe krwasans ekonomik se saki Minis Baichoo inn fer-dren, pon, simen, ronpwin, kanal, pasrel, ... Larzan pu sa kalite proze la pe fini. Zot dir bizen kup depans Guvernman. Pu sa osi, burzwazi ek IMF pe dimann Guvernman fer targeting pu servis sosyal, kup sibsid ki klas travayer benefisyen, e privatiz tu sa ki kapav. Sel zafer ki finn reysi maske enn kriz dan nu balans peyman se par vann bizu: later ek dibyen leta.

Aster avek MMM ek PT ki pena okenn program politik ek ki pena mem bann prinsip politik, zot klerman a-la-mersi klas sosyal ki pli for: burzwazi. Nerpport ki kontradiksyon segonder ant buzwazi deta (kapitalis ki depann lor faver leta pu zot prop avansman) ek burzwazi istorik (kapitalis ki ti anrisi zot pandan lepok kolonyal) pa tro relevannt, apar pu determinn rapor-defors ant MMM (burzwazi istorik pli pre avek MMM depi 1983) ek PT (burzwazi deta so leker mem).

U truve, kuma LALIT ti prevwar depi enn lepok, MMM ek PT zot su enn bel presyon depi burzwazi pu fer enn lalyans politik. Somaz, mem si u mizir li dan enn manyer bankal (selwi ki finn travay pu ennertan semenn davan konsidere kom pa somer) pe koste ar 10%. Pri disik, kuma LALIT ti prevwar kapav kontinye degringole a-tel pwen ki li menas sa sekter la. Rapel ki li enn sekter kann, ki kontiyn akapar tu later ki kapav plante e ki tuzur, anfet, donn travay, mem sezonye, a plis ki 10,000 dimunn e ki sutenir 15,000 a 20,000 planter kann, pe menase ar bankrut. Savedir ki sa 'Blok Istorik' ki finn diriz Mauritius pandan 80 banane pu kase. Sa pe arive anmemtan ki sekter turis ek konstriksyon pre pu vinn enn katastrof. Sekter banker kapav vinn frazil parlaswit si sa de sekter la kul plis. Tusa montre enn kriz sistemik byin grav. Sa zar kriz la baskil tu dan dezord – pa zis lekonomi, me osi politik ek sosyete-mem, kuma nu pe truve.

Malerezman, se popilasyon ki plis sufer. Lafami kuma enn institisyon pe eklate. Ena buku buku vyolans dan lafami. Fam ek zanfan ki plis sufer. Moralite lepok-avan inn fini mor, tandi ki enn nuvo moralite pankor pran nesans.

Ki faktor finn presipit preske-enn-lalyans le 17 Avril?

Sa rankont Ramgoolam-Bérenger finn fer le 17 Avril enn kut



Desin Joan Miro

brit, finn san-dut kontribye pu provok dezord dan leran PT ek MMM. Me, ki bann faktor ki finn provok, ubiyin kapav finn provok, lefet ki sa reynion la ti fer 'enn kut brit'?

- Foto ki montre Ramgoolam pe dibut akote enn Rolls Royce dan Lond, pibliye dan *Week-End 13 Avril*? Eski ena kik menas deryer publikasyon enn tel foto, ki finn presipit reynion ant Ramgoolam ek Bérenger?

- Kes Diego Garcia dan UN-CLOS ki pe pran aprezan dan Istanbul? Eski *sa* met presyon lor Guvernman ek Lopozisyon pu fer enn fron komen lor vites?

- Eski ena bann Minis ki pe malalez dan Travayis, pe menas fronte?

- Bérenger ti anonse le 5 Avril ki li pu demantel sistem santralize ki pe kolekte ranseynman ek lanprint dizital pu Kart Idantite biometrik. Eski sa inn provok enn panik parmi bann bizinessmen pro-PT ki finn gayn pli gro but dan sa bann kontra par milyar rupi, e eski zot pe met presyon pu enn lalyans PT-MMM?

Asterla?

Napena okenn itilite al met larzan, kuma fer lor suval kot buk-maker, lor bann posibilite. MMM kapav al fer enn nuvo Lalyans avek MSM (MSM kuma enn 'junior partner', petet), kuma li kapav

reysi konklir enn Lalyans avek PT kuma MSM ek PTr kapav fer enn *Remake 2010* ansam, kuma kapav sakenn al so kote, dan enn mach a trwa?

Ki LALIT propoze dan sa sityasyon politik la. Ena enn lartik byin kler ki Ram Seegobin finn ekrir dan *Le Mauricien* ki ti sorti Vandredi 25 Avril, su tit, '*Pu enn Retur a Politik de klas*'. Lartik la finn re-pran dan nu websayt dan *News Section*:

www.lalitmauritius.org

Ladan li gid nu kimanyer evit tom dan sinism ek dezespwar ki sa kalite politik amenn nu, ek anmemtan met dibut enn vre chalennj politik a enn sistem ki pe prodir telman sufrans ek inegalite dan lemond antye. Sa vre chalennj, li enn chalennj de klas.

Bann klas sosyal ki finn expropriye dan lepase, setadir perdi zot dibyen ek zot puvwar, me ki tuzur prodwir tu larises dan lemond, bizen azir pu deklans enn revolisyon dan sosyete, pu pran puvwar. E sa kapav fer, selman si azir avek prinsip, si lite deryer enn program ki kontinye devlope e ki nu konstrwir ansam, e lor lekel nu depann pu sorti kot nu ete zordi pu al kot nu ule ale dimen. Sertennman, kuma Ram Seegobin dir, li pa sifizan al vote enn fwa dan 5 an.

AVAN SAK ELEKSYON ZENERAL MISYON PRO-KAPITALIS GILBERT AHNEE

Avan eleksyon zeneral 1987, Gilbert Ahnee, kan li ti Adzwin Redakter *Le Militant*, ti dan lekip MMM ki ti pibliye enn lartik totalman invante, konkokte but-an-but, kalomni lor kalomni kont *LALIT*. Sa lagazet la, e so seri an antye (“*Le Nouveau Militant, Nouveau Series Numero 1*”, le 8 Ziyet, 1987) ti sorti avek enn sel bi: pu kas lalyans ki *LALIT* ti deza fini fer ar OMT-FNAS Dev Ramano ek Serge Rayapoullé. Lalyans *LALIT* ek OMT-FNAS ti fini aliyn 60 kandida, e sa ti reprezent premye chalennj electoral a sa politik ekonomik neoliberal ki Bérenger ti’nn adopte depi 1982, e ki ti telman inpopiler, e ki anfet finn kree buku problem pu Moris apre.

Lekip Ramano, ansam ar 2-3 gran dirizan sindika GWF ek FPU, finn tom dan pyez *Le Nouveau Militant*. Pli pir, zot finn vande, kas lalyans ar *Lalit*, e mem al deziste apre dat dezisteman legal, travay uvertman pu MMM. Misyon akonpli pu Ahnee & Co.

Dan bild-ep ver eleksyon zeneral 2005, Gilbert Ahnee, kan li ti Redakter *Le Mauricien*, ti residiv. Li ti pibliye enn lartik baze lor enn trikotaz mansonz Ashok Subron ek Veena Dholah kont *LALIT*, kan byin apre zot demisyon depi *LALIT*, zot ti invant enn senario pu sey zistifye zot demisyon dan *LALIT*. Ankor enn fwa, lartik Ahnee ti dan enn moman kot *LALIT* ti pe chalennj politik ekonomik Guvernman dan enn eleksyon zeneral. Nu ti pe met lor azanda sa kriz sistemik, ki zis zordi, 9 an plitar, burzwazi pe konsede existe. Buku lefe nefast sa kriz sistemik la ti kapav anfet evite. Me, Ahnee finn, ankor enn fwa, anpes met size “*lekonomi*” lor azanda politik. So travay politik se pu gard lekonomi

enn “sase garde” pu bann gran misye proprieter later, lizinn, lotel, labank, lasirans. Mem si li, Gilbert Ahnee, li res enn sinp anplwaye.

Asterla, avan eleksyon zeneral 2014-15, Gilbert Ahnee, dan “*L’Express Dimanche*” (enn lagazet grup *La Sentinelle*) pe kumans fit so plim pu grat lezot betiz lor papye, tuzur dan so demars defann klas kapitalis. Sann kut la, li mem truv so rol se pu amar lagos ar gran kapital: Li kritik *LALIT* pu “*intransigeances dogmatiques*”, kan li dir nu ti bizin plito kuma *Rezistans ek Alternativ*: “*On rencontre, parmi les divers anti-communalistes du Blok 104, des cibles toutes désignes d'une lutte des classe engagée du bas de l'échelle socioprofessionnelle.*” Li pe dir *LALIT*, nu osi, nu ti bizin mars ar Pippo Forget, patron Gilbert Ahnee, kuma Subron fer, setadir ar sef MCB rekonverti an sef *La Sentinelle*. Pa zis sa. Nu ti bizin mars ar “*des chefs d'entreprise*” dan “*mouvance écologique*”. Sirman li pe fer referans a kampayn Médine anfaver so IRS ek kont Gamma Civic. Enu bizin osi, dan lalit kont koripsyon, mars ansam ar “*des assureurs et des banquiers*”, setadir ar lel kapital ki notwar pu so tandans plito fasizant, anokirans kapital finansye.

Sa vedir, ki Ahnee pe travay pu lagazet Bérenger an 1987, ki li pe travay pu lagazet M. Rivet an 2005, ubyin ki li pe travay pu lagazet M. Forget an 2014, so travay res konstan: li defann drwa divinn 5% popilasyon dan klas kapitalist pu desid lor lekonomi, enn lekonomi lor lekel 100% popilasyon depann pu sirviv. Ahnee pa ule nu re-met sa ankestyon. Zame! Dapre li, li enn blasfem kont drwa divinn klas kapitalist pu kontrol buse-manze tu dimunn lor planet, ziska lafin ditan.

Alor, kan Ahnee pe koz “*forces démocratiques*” ki bizin inifye, li pa pe reyelman koz “*forces démocratiques*”, me plito diktatir enn klas mari minoriter, setadir klas kapitalist. Li pe inkli “*forces autoratiques*” dan “*forces démocratiques*”. E, etan done, sa bann “*forces autoratiques*” zot deza opuvwar, kan “*forces democratiques*” al inifye ar zot, u riske detrir sa tigit “*forces démocratiques*” ki existe aktyelman. Sa, li pa zis “*verbiage*” *LALIT*, kuma Ahnee dir. Li lefe reyel ki swiv enn aksyon ireflesi.

Alor, anu atann, gete ki kalite mansonz Ahnee pe prepare kont *LALIT* avan prosenn eleksyon.



FIKSYON POLITIK

KONVERSASYON TELEFONIK INTERSEpte PAR C.I.A.

Tu dimunn kone ki depi inpe letan, servis sekre Amerikin pe espyonn tu dimunn lor bul later, sirtu bann sef guvernman ek minis lezot peyi.

Espyon Amerikin lor Baz Diego finn intersepte enn konversasyon telefonik dan Moris, me zot finn geyn difikilte dekod sa konversasyon la. Alor depi baz Diego, zot finn anvoy mesaz la dan Kartye Zeneral CIA, kot ena gran dekoder ek siper-ordinater ki kapav kas nimport ki kod.

Pandan ki mesaz la pe al ver Kartye Zeneral CIA par internet, nu finn reysi pirat enn kopisa konversasyon telefonik la. Me nu osi nu finn gayn difikilte kas sa kod la, telman li paret sofistike. Alor nu fer enn lapel a tu nu lekter: si zot ena enn lide ki pe kasyet deryer sa mesaz kode la, rann nu enn servis, fer nu kone.

Ala enn transkript sa konversasyon telefonik ki ti derule Merkredi 7 Me 2014:

Portab Nimo 1: Alo AKS, isi NCR. Nu kapav koze, to pa lor volan?

Portab Nimo 2: Non mo pa lor volan, kapav koze mo kamarad.

NCR: To ka pe vini divan Lakur Siprem dime. Mo pe telephone pu dimann twa rann mwa enn servis.

AKS: Byen sir NCR. Me kuma to byen kone, enn servis, li donan-donan. Ki mo kapav fer pu twa?

NCR: Ki donan-donan? La to pe koz kuma enn sindikalist. Dime mo pe anvoy SF ki pe ranplas YV, pu fer enn deklarasyon divan lakur komkwa byento to pu gayn ful satisfaksiyon pu to revandikasyon.

AKS: Mo ti enan lintansyon reklam enn “early trial”: nu finn ase fer yoyo ek sa zafer la, nu pe kumans perdi lafas.

NCR: Zisteman samem servis mo pe dimande: si dan plas reklam enn “early trial”, to dir to avoka dir lakur ki zot fer nu konfyans ek ranvoy ka la pu enn mwa. Lerla mo pu gayn ase letan pu tripot enn zafer ek soz: to kone kisannla mo pe koze.

AKS: Abe ki mo ena pu gayne ladan. Dimunn pu dir mo pe fer plis ki konplezan. Mo pa krwar mo pu kapav rann twa sa servis la.

NCR: Get sa AKS, to pa ule mo fer tu dimunn kone ki mo pa finn reklam “cost” kan to finn perdi to zafer divan Konsey Prive Larenn, alor se larzan piblik ki finn gaspiye!

AKS: OK, mo aksepte pu ranvoy ka la pu enn mwa.

NCR: Mo ti kone ki to pu dakor pu rann mwa sa servis la. Tultan mo dir ki to enn bon garson. An pasan: mo tande ki bann baron pe amenn to lavi dir dan negosyasyon.

AKS: Pa koze, ek mo pa pe gayn okenn kudme depi to kote. Ki kalite donan-donan sa.

NCR: Pa pran enn su traka: nek pran kontak ek ND, mo pu dir li gete ki li kapav fer pu twa, me rapel ki apre to pu bizin remersye li an piblik.

INFO INFO INFO

FIM KLIB

Prosen fim ki pu gete apel The Past par Asghar Farhadi (2013). Kontakte manb pu gayn invitasyon.

FAM FAS-A KRIZ

Reynion lor Fam fas-a Kriz Ekonomik, Politik, Sosyal. Pu ena enn reynion uver Samdi 14 Zin. Pu invitasyon kontakte enn manb.

TI BATO PAPYE

LPT ek Immedia pe pibliye enn rekey poem Ti Bato Papye par Alain Fanchon, me an 46 langaz differan pu selebre 46 lane Lindepandans. Me, telman sa lide la finn gayn sutyin, zot fini gayn plis ki 50 differan langaz. Rezerv u kopi tuzur. Li pe sorti an Septam.

KOZRI DAN KAD BOOK WEEK

Lindsey Collen ti koz ar zelev Western Primary School lor kimanyer ekrir enn liv. Sak zelev depi bann 5 an ziska bann 12 an, pe ekrir so prop liv.

INSTITUTE FOR LEGAL & JUDICIAL STUDIES ORGANIZ KUR EKRIR KREOL PAR OPEN UNIVERSITY-LPT

Pe ena enn kur 5 kinzenn pu transkriber Lakur Distrik lor kimanyer ekrir Kreol dan grafi ofisyel. LPT pe asir profesor dan sa kur, ki ena enn parti fas-a-fas ek enn parti “distance learning”.

Salon de Me

Sa semenn la Salon de Me pe fer so expozisyon kolektif anyel. Me, pu premye fwa, li pu lor enn tem spesifik: *Maurice Isles Durable*.

GRO LINTERE BIZNES

B.A.I., FIRM PROS AR PT, DEKROS KONTRA!
M.C.C.I. ek VALDUS OSI.

Dan Parlman an Novam 2013, Premye Minis Ramgoolam ek Minis ICT Chedumbrum finn kasyet deryer enn lakor siyne ant Guvernman Moris ek Guvernman Singapur pu implemantasyon kontra lor nuvo kart ID biometrik. Pa ti ena okenn apel dof pu sa imans kontra la. Sa opasite ti posib akoz kontra *Government-to-Government* exanpte. Mem si li pu Rs 1.1 milyar, ubyin plis.

Me, anu gete ki finn arive. Kot sa gro lamone piblik finn ale e pe ale? Eski li vreman sort Government of Mauritius al Government of Singapore? Ubyin eski li hi-jak ver konpayni prive Moris? E si wi, ki konpayni prive? Nu bizin mazine ena enn gro morso kontra ki al dan met dibut ek rul database santralize, ek pli tipti

Guvernman Singapur finn anplas-anplas al alwe sa kontra la a so konpayni etatik *Singapore Corporation Enterprise* kot ena kloz konfidansyalite laba osi (*Non-disclosure agreement*). Sa konfidansyalite la anpes Guvernman isi rann kont kot sa Rs1.1 milyar pu Kart Idantite pe ale. Kifer zot finn pran tu sa lapenn, travers par Guvernman ek par korporasyon etatik la? Eski li parski Guvernman Ramgoolam-Beebejaun-Chedumbrum pa ule piblik kone dan kisannla so pos sa gro larzan la pu aterir?

Evidaman ena gro lintere pu bann kapitalist pu sa bann kontra ki pu ariv ziska Rs 1.1 milyar pu kart ID biometrik. Anu gete kimanyer kas la finn partaze.

BAI gayn kontra

Singapore Corporation Enterprise li rant dan enn konsortiom ansam avek 2 konpayni Singapur: *Crimson Logic* ek *NEC Asia*.

NEC Asia, li, li ena enn partner dan Moris. Sa konpayni Moris la apel *Technology Management Services*. Ki sa ete, sa TMS la? Li kareman enn sibsidyer *British American Investment* (BAI), konpayni Beebejaun-Rawat. Ala kimanyer Guvernman Moris travers Guvernman Singapore pu avoy larzan dan pos konpayni ki pros ar li.

MCCI ek Para-etatik

Konpayni Singapur *Crimson Logic*, li osi ena lyin ek konpayni Moris, li. *Crimson Logic* posed 40% aksyon dan enn konpayni dan Moris apel *Mauritius Network Services* (MNS) ansam avek enn 2yem konpayni Morisyin apel *Maurinet*, ki proprieter 60%. Konpayni *Maurinet* ki li ete, anfet? 53% so aksyoner se bann para-etatik Moris, setadir bann konpayni Leta, ek 47% so aksyon li pu Sanb Komers ek Lindistri (*Mauritius Chamber of Commerce and Industry* – MCCI). Setadir Leta Moris ek kapitalist Moris finn fer enn joint venture pu kon-trol sa konpayni *Maurinet* la.


Valdus rul Konversyon

Valdus, enn konpayni baze dan Goodlands, finn site dan Parlman kuma enn parmi bann konpayni ki finn gayn kontra pu konverti ansyin kart dimunn a nuvo kart ID biometrik. CEO Valdus ena repitasyon kuma enn politikman pros Ramgoolam.

Kan Premye Minis Ramgoolam ti fer diskur dan Parlman le 9 Ziyet 2013 pu zistifye kifer se Guvernman Singapur ki finn gayn kontra kart ID biometrik, li finn dir ki li pu de rezon: akoz Guvernman Singapur ena enn

repitasyon ki li “above board” lor sa kalite kestyon la, ek dezyeman, pu rezon “sekirite”. Me, eski sa ki apel “above board”? Kan nu truve ki se enn sibsidyer BAI, konpayni pros Guvernman Travayist, ki se burzwazi dan Sanb Komers ek Indistri, ki pe benefisyé depi gro kontra Rs 1.1 milyar, pu data-base santralize, ansam ek MCCI? E kan pros Travayis dan Valdus ki pe benefisyé travay konversyon, asterla nu konpran pli byin ki Ramgoolam konpran par “above board” ek “sekirite”.

Dayer, sayt MNIC pena okenn sekirite. Enn serser apel Ish Sookun finn devwal enn total mank sekirite lor sa sayt la. E se sa M. Rao Rama ki vinn donn lasirans lor sekirite done dan MNIC. Dayer, MNIC finn dir lapolis ki li finn perdi enn Hard-Dis avek done Leta Sivil ladan, e lerla li finn vinn dir ki sa hard-dis pa ti perdi. Sa hard-dis ki pa ti perdi la ti ena enn nimero ki Biro Premye Minis ti pibliye!



Desin Escher, Ascending & Descending

GO-SLOW KONTINYE PU NUVO KART IDANTITE BIOMETRIK

SKANDAL LOR SEKIRITE AMATER M.N.I.S.

Apre skandal hard-dis ki ti disparet, asterla ena nuvo skandal lor paz websayt MNIS ki finn montre febles dan so sistem sekirite. Ish Sookun enn Informatisiy finn exposz febles ek fason amater MNIS gard data lor viziter lor sayt. Dan enn lartik explikasyon dan *Le Mauuicien* 22 Me, 2014 li finn donn detay lor so dekuvert. Tit so lartik, li “*Serious doubts over handling of the MNIC website project, over supervision and security audits...*”. Li dekortik dan enn

fason akablan nivo byin ba, ape-pre ekivo badinaz zanfan Form II, dan sekirite sa sayt la. Li montre klerman sa mank serye dan enn websayt apartenir a enn Guvernman.

Antretan ena enn ralantisman, kote dimunn ki al anrezistre, dan tu Sant Konversyon pu nuvo kart idantite. Avez enn tel ralantisman, nu estime ki pu ena par milye dimunn ki pa pu finn tir nuvo kart idantite ziska lafin Ut. Aktyleman ena plis ki 300,000 dimunn pa finn al tir kart.

LALIT pe swiv bann diferan ka lakur e anmemtan pe gard modord “Go-Slow” pu nuvo kart ID. Nu pe gard modord go-slo ziska Ut. An Ut, nu pu donn enn nuvo modord lor ki mars aswiv, pu ki nu kontinye met Guvernman divan so responsabilite.

Nu remarke ki MMM, ki ti fer apel pu Guvernman kraz so database santralize pu done ID Kard, avan Bérenger so nuvo staz “lopozisyon lwayal”, kot li finn kumans res trankil.

DAN SANT KONVERSYON NUVO KART IDANTITE MIZ-ANGARD LALIT A BANN OFISYE

Dan mwa Avril LALIT finn servi enn notis formel, min-prop, a sak ofisyen dan sak sa 14 Sant Konversyon dan Moris pu met zot angard pu pa anbet dimunn tir kart avan ki li vinn obligatwar, setadir avan Septam 2014.

LALIT finn osi atir latansyon sa bann ofisyen la ki ena 3 ka Lakur Siprem ki pe remet an kestyon legalite ek konstitusionalite sa nuvo kart la, donk kapav nuvo kart la pu deklare anti-konstitusyonel.

LALIT finn osi fer mansyon dan so notis ki, dan lepase, finn ena long lalit, Nelson Mandela ek Mahatma Gandhi parmi, enn lalit ki ti kont sistem pas ek obligasyon pu donn lanprint dizital.

LALIT finn fer bann ofisyen osi kone ki an 2010 dan Grand Bretayn, apre mobilizasyon lamas dimunn kont nuvo kart idantite, Guvernman Britanik ti oblize detrir data-beys ek tu nuvo kart. Dan Leta Zini ek Lostrali, lamas dimunn finn rezet nuvo kart idantite.

Ena danze ki Nuvo Kart idantite pu donn plis puvar a Lapolis odetriman drwa sitwayin, osi byin ki donn akse a linformasyon konfidansyel a Premye Minis, lapolis, ek pwisans etranzer.

Nu pe pibliye notis dan so integralite:

NOTICE ADDRESSED TO OFFICERS

This notice is being formally addressed to you as an official involved in the issue of the new compulsory biometric ID cards, either for the private company Valdus, or for any other private company involved in ID Card “Conversion”, or to you as a civil servant involved in this work:

Bearing in mind that you may not be aware

- that there are three different Supreme Court Cases challenging the legality, and even the Constitutionality, of the new compulsory biometric Identity Cards and the data-base they are linked to, which may both be declared unconstitutional, as indeed they have already been in other countries,
- that you are encouraging people who are or may themselves be unaware of the possible illegality or anti-constitutionality of the new ID Card System, to take out these new Cards when the old ones are perfectly legal until 15 September, 2014,
- of the long struggles of both Nelson Mandela and Mahatma Gandhi, two leading figures in freedom struggles of the last 100 years, against such “passes” and against thumb-printing of the entire population of innocent people,

And noting

- that the obligation, under the new ID Card laws, for each citizen to present this ID Card to Police Officers changes the balance-of-forces *against* ordinary citizens, who will be at the mercy of officers of the State, just in order to circulate in the country and to access ordinary facilities,

- that this new centralized data-base containing private information on all Mauritian citizens, can later, by a simple Regulation, include “any other particulars” on individual citizens, and that this data is exposed to leakage into the hands of political leaders like any Prime Minister, into the Police’s hands, and into the hands of the secret services of foreign States, and
 - that a centralized fingerprint data-bank can easily change the presumption of innocence, which is the sacred principle of our criminal justice system,
- And bearing in mind that you may be unaware
- that in Britain in 2010, the elected Government destroyed its new biometric ID card data-base and ID Cards because the people of Britain voted to get them destroyed, even though the ID Cards were not even compulsory there; people opposed and got rid of the biometric cards introduced by Prime Ministers Blair and Brown because of their intrusion into privacy, infringement of fundamental human rights and ongoing crippling money-cost to the people,
 - that, inter alia, the people of Australia, too, rejected biometric ID Cards, and the people of the United States of America rejected the “Smart Cards” George Bush had introduced, and
- We remind you
- that you ought not be involved in giving any misleading information to citizens as to the need or legal obligation for the new ID card before 15 September, 2014 and ought to avoid bringing to bear any pressure on citizens of the country, through any words or deeds, for them to be involved in committing an act which may turn out to be illegal or anti-constitutional,
 - that you should ensure that the public is informed that the new compulsory ID Cards may be found by the Supreme Court to be illegal or un-Constitutional, and may eventually be destroyed,
-



KONFERANS DEPRES LE 16 AVRIL GO-SLO LOR NUVO I.D. KARD KONTINYE: “DETRIR DATA-BEYS SANTRALIZE!”

23 lorganizasyon finn mintenir modord pu go-slow lor konversyon a nuvo Kart Idantite. Zot finn osi siyn enn petisyon pu revandik ki Premye Minis sispann prosesis ramas lanprint dizital tu sitwayin, kraz so data-beys ki deza ramase, dezaktiv pis elektronik lor kart deza livre, servi sa lamwatye nuvo kart ki fini livre parey kuma ansyin kart, ek amand lalwa pu ki li nepli pu obligatwar prezant kart la a lapolis.

Kan zot ti prezant sa petisyon a lapres le 16 Avril, reprezantan CTSP ek LALIT finn donn sa modord la e met divan sa 5 revandikasyon la, lor nom 23 sinyater petisyon.

Sirveyans repesif


Reeaz Chuttoo, lor nom CTSP, finn dir kimanyer bann “leta sirveyans” kuma Singapore finn kree enn lekonomi ki depann lor enn sistem diviz klas travayer ande, seki sitwayin e ki mars ar so

Kart Idantite ek seki travayer depi lot pei lor kontra ki pena sa Kart la. Li finn osi dir ki travayer sektor prive finn masivman rezet prezans par lanprint dizital obligatwar, e sa pratik la finn dayer dekrete ilegal.

Alain Ah-Vee, ki ti prezide, finn dir ki Guvernman finn gayn buku difikilte pu inpoz nuvo Kart Idantite. Li finn oblize sanz so taymtebl par trans laz, sanz so ler luvertir, anbrigad patrona dan prosesis la. Guvernman finn osi ena rekur a enn masinnri rimer lor nesesite swiv so taymtebl ki finn mars de-per avek enn kanpayn intimidasyon, sirtu anver dimunn aze.

Lindsey Collen finn dir ki, kan nu pe al ver 2/3 letan alwe pu exersis, ena mwins ki lamwatye dimunn ki finn tir zot kart. Buku dimunn byin ankoler kont Guvernman. Protestasyon pe monte kont kart ek so data-beys

santralize. Dimunn ki finn pran kart, zot osi, zot kont. Guvernman pe gaspiy larzan piblik sak zur li al delavan avek sa proze ki pu andet pei dan enn fason akablan.



2^{YEM} PETISYON LORGANIZASYON v/s ID KARD

Nu, bann su-siyne, swit-a 1er “petisyon lorganizasyon” kont nuvo sistem Kart Idantite biometrik obligatwar sirkile par CTSP ek LALIT an Septam 2013,

Nu konstate:

- Ki nuvo Sistem ID KARD li reprezent enn menas pli grav ki nu ti realize a-lepok;
 - Ki sa “sistem” ki deryer nuvo Kart ID, li vreman anti-demokratik, li invayir nu prayvesi, li sanz prezonpsyon linosans dan ka o-kriminel dan Lakur.
 - Ki so kad legal, si li pa amande, pu permet ofisyel lapolis ek lezot ofisyel arsel nu lor sime, lor laplaz, dan loto, dan bis, lor motosiklet, apartir 16 Septam 2014;
 - Ki tu sa data santralize la, li expoze a vol, haking, vande pu bezwin piblisite, “egare”; Guvernman riske pey domaz lor domaz;
 - Ki, anplis, Data Protection Act klerman permet fwit sa linformasyon prive lor sitwayin ver politisyin o-puvwar, lapolis, ek servis sekre pei deor;
 - Ki sistem servi lanprint dizital pu prezans dan travay finn dekrete “ilegal” su Data Protection Act;
 - Ki Guvernman pe pey konpayni prive lor baz latas, setadir “par kart”, alor Guvernman, kan li ankuraz dimunn tir kart avan Zizman Lakur Siprem dan 3 ka Konstitusyonel, pe riske depans larzan piblik dan vid;
 - Ki, lane apre lane, Guvernman pu ena depans akablan pu fer depi fon piblik pu nuri sa data-base deryer kart la; antretan konpayni prive pe fer profi lor sa nuvo “Identity Scheme”;
 - Ki finn ena tu kalite fos rimer ti pe fane par sertin ofisyel kumkwa piblik ti oblize al tir Kart Idantite avan lafin Mars, sinon sipozeman ti pu ena lamann;
 - Ki sertin ofisyel Leta Sivil, komi Sekirite Sosyal, Lapos ek mem Labank, pe met presyon pu tir nuvo kart ID, avan-mem ki Lakur Siprem statye lor legalite sa Identity Scheme la;
- E, malgre tu sa presyon ek propagasyon fos linformasyon, malgre ki plis ki lamwatye peryod “konversyon” fini traverse
- Ena 545,000 dimunn lor 945,000 ki PANKOR al tir zot nuvo kart idantite biometrik obligatwar; Alor sa vedir ena bel-e-byin enn go-slow pe derule dan pei;
 - E malgre ki 400,000 dimunn finn tir nuvo kart, laplipar dant zot anfet kont nuvo sistem la;
 - E asterla, swit-a sikse sa go-slow la, e swit-a rezeksyon masiv sa nuvo “Leta Sirveyans” ki kuma “pass law”;

Nu pe fer apel a Guvernman:

1 Pu sispann deswit tu prosedir pran lanprint ledwa dimunn inosan ek foto biometrik;

2 Pu detrir database santralize ki deza pe akimile, kuma GM finn fer an Angleter an 2010;

3 Pu dezaktiv sa pis dan Kart ID ki fini livre;

4 Pu servi nuvo kart la selman kuma ansyin kart ti servi (sel diferans se so plastik modern).

5 Pu amand lalwa pu ki li nepli pu obligatwar prezant nuvo kart idantite a okenn ofisyel.

E nu pe donn modord pu kontinye go-slow tan ki Guvernman pa fer sa 5 zafer la.

Kumsa nu pe exprim nu dezakor avek sa nuvo sistem sirveyans la.

Siyne:

Association des Consommateurs de L’Ile Maurice - ACIM ...	Jayen Chellum
Congress of Independent Trade Unions (CITU)	G. Bhujan
Labaz Intersindikal	Ragini Kistnasamy
REGRUPMA Travayer Sosyal	Dr. R. Madhewoo
Muvman Liberasyon Fam (MLF)	S. Kalla
Centre Idrice Goomaly	Samad Dulloo
Ledikasyon pu Travayer (LPT)	Rada Kistnasamy
Federation des Travailleurs Unis (FTU)	Atma Shanto
JUSTICE: Ass. Against Violence by Officers of the State.....	M. Desmarais
Federation of Pre-school Playgroups	Martine Mavisa
Association Travailleurs Sociaux de Maurice	Ally Lazer
ABAIM	Marousia Bouvéry
Union of Staff of Ireland Blyth Ltd	Anand Purahoo
Soap and Detergent Workers Union	Khalick Gurreebun
Chemical Manufacturing & Con. Trades Emp Union	Steve Bourdon
Private Enterprises Employees Union (PEEU)	Sharmila Dusaye
Newspaper and Printing Industry Employees Union ...	Richard Camathee
Federation of Trade Unions of the Chemical Sector	Veer Gokool
Federation of Private Support Services and Other Unions ..	Jane Ragoo
Construction, Metal, Wood & Rel Ind Em Union	Stellio Cunnusamy
Federation of T.Unions of Construction, Wood & Metal	James Tanner
Confederation Travailleurs Secteur Prive	Reez Chutoo
LALIT	Lindsey Collen

SEKTER PRIVE MONT ASHOK SUBRON KUMA ENN “ALTERNANS”?

Zordi, kan reprezantan kapitalis pe dir zot ti pu prefer opsyon enn guvernman PT-MMM ki ase for pu fer travayer ek dimunn mizer sarye fardo kriz ekonomik, bann ideolog burzwa pe osi reflesi lor ki “alternans” politik zot ti pu prefer ena. Zot koz “alternans” politik, parski zot sirtu pa ule enn *alternativ politik sosyalist* kuma ti arive apre koalisyon PT-PMSD an 1969. Zot ule enn “alternans” ki, li osi, ena enn politik ekonomik ki dan lintere klas kapitalis dan so globalite. Ena plizyer editorialist ki pe truv Ashok Subron ek so Rezistans kuma enn posib “alternans”.

Gilbert Ahnee, editorialist *L'Express*, par exanp, kumadir pu rasir sekter prive, propoz enn “alternans” demokratik kumsa:

“... le moment n'est-il pas venu pour nos forces democratiques de rechercher un consensus acceptable de tous? Il y a, au sein de la mouvance ecologique, aussi bien des chefs d'entreprise que des altermondialistes. On trouve, parmi les militants anti-corruption, des assureurs et des banquiers. On rencontre, parmi les divers anticommunalistes du Blok 104 [Subron etc], des cibles toutes designees d'une lutte des classes engagee du bas de l'echelle socioprofessionnelle. (...) Recherchons plutot un consensus pour l'alternance.” (*L'Express* 4 Me, 2014).

Ahnee pe asir bann kapitalist ki Ashok Subron deza mars ar gran kapital, sib mem lalit klas travayer, setadir Philip Forget, ki ansam ar Subron dan Blok 104.

Nad Sivaramen, li osi editorialist *L'Express* (li ti deza an-plwaye U.S. Central Command/Combined Joint Task Force) pran lapenn ekrir enn editorial net lor Ashok Subron ek so Rezistans ek Alternativ ki ena tit “Et si c'était eux la vraie alternance ?”

“... on ne saurait passer sous silence, ou minimiser, l'impulsion

qu'Ashok Subron donne à Rezistans ek Alternativ depuis 2005. Dans leur combat en faveur du mauricianisme, les Rezistans, encouragés en chemin par une quarantaine d'autres citoyens – (créant le désormais célèbre Blok 104; puissant symbole citoyen qui donne à cette alternance politique nécessaire des visages bien mauriciens, venus de divers horizons) – ont réussi à mettre au pied du mur le puissant gouvernement Ptr-PMSD (...)” (*L'Express* 10 Mai, 2014).

Rezistans pa finn pran lapenn reponn Gilbert Ahnee u Nad Sivaramen, me par kont, zot finn reponn Nathalia Vadamootoo ki finn dekrir Ashok Subron dan so intervyu *L'Express* kuma enn zom patron. Remarke ki *L'Express* finn swazir pu met sa extre la angran dan enn bwat, pu atir latansyon lor parol Nathalia Vadamootoo, mem zur ki Gilbert Ahnee ekrir lor Rezistans kuma enn “alternans”.

“Ashok est un agent du secteur privé (...) Ashok est considéré comme un héros de la lutte syndicale, mais quand on se renseigne sur ce qu'il a obtenu comme accord, on se dit qu'il se fout de nous. Pour moi, c'est un faux héros qui fait le jeu des patrons.”

(*L'Express* 4 Me, 2014).

Klerman *L'Express* ti anvi atir latansyon lor Ashok Subron kuma kikenn ki sekter prive kapav fer konfyans, sinon zot pa ti pu met enn tel deklarasyon enpe for kont li.

Travay kont Kapital, uswa travay pur Sitwayin?

Bizin dir ki Ashok Subron ek so Rezistans finn pret flan a sa kalite montaz la.

Le 1 Me, kan enn kote MMM ek PT finn anil sel rasanbleman politik kot zot bizin pran kont lintere klas travayer antan ki klas, lot kote Rezistans finn swazir li, pu sanz natir selebrasyon “Travay kont Kapital” Fet

Travay pu fer li vinn enn “Fet Sitwayin”. Li finn kareman invit tu “sitwayin” dan rasanbleman ki li finn fer konzwintman avek GWF ek CARES dan Vallijee. Sa li enn desizyon konsyan, setadir pu pa invit zis dimunn oprime par kapital. Note ki “sitwayin” inkilir patron osi. Tu dimunn sitwayin, pa zis travayer ek dimunn oprime. Tu kapitalis Moris, zot sitwayin. E Subron invit zot dan so rali Fet Travay.

A.Subron ankuraz aksyonarya dan IPP

Sa Fet la vini zis enn-de semenn apre ki A.Subron ek CARES finn fer apel pu ki individu, asosyasyon ek mem sindika aste aksyon dan enn *Independent Power Producer* (IPP) avek lekel CEB pu aste elektrisite. Ena enn long lalit sindikal ek politik pu expoz privatizasyon CEB atraver politik plizyer guvernman pu diminye prodiksyon CEB e fer CEB aste elektrisite prodwir par sekter prive atraver IPP. Asterla nu pe truv A.Subron ek CARES pe al met enn IPP dibut, zot-mem, e mem sey ris lezot sindika ladan.

Ashok Subron ekrir lor so paz facebook:

“Citizen's shares to adhere to the PCRE is Rs 1,000, plus an entrance fee of Rs 100. However [dixit] citizens and organisations who can afford it, are encouraged to buy Rs10,000 of shares. A mass campaign will now be launched all around the country for citizens and organizations to join the cooperative and to raise some Rs 40 million to set up the first cooperative solar farm at the Balaclava. One the innovation of the PCRE is that the cooperative is open to existing registered associations, unions and other cooperatives in Mauritius.”

Alor, pu ki zot koperativ fleri, zot pu bizin viz pu vann kuran osi ser ki posib ar CEB, ki pu ogmant pri kuran pu publik. Sa vedir zot

finn met zot dan pozisyn malere kot zot pu benefisyé sak fwa ena ogmantasyon papye lalimyer.

A. Subron defanser “propriyete prive”

Eski li etonan ki Ashok Subron met li ek so parti dan enn tel pozisyon, kot li benefisyé depi ogmantasyon fre kuran?

Kan li ti portparol CSG, Ashok Subron ti deza kumans defann konsept sakre pu burzwazi, setadir “propriyete prive”, tu kalite konfondi, kuma enn sel konsep.

An 2009, kan CSG ti lans petisyon kont dediksyon 1% depi lapey travayer pu finans enn fon lisansiman dan sekter prive, ki rezon li ti swazir pu mete pu kifer travayer kont sa prelevman la? Li ti kapav swazir enn dan buku rezon valab. Me, li ti dir li kont akoz enn travayer so lapey li so ... “propriyete prive”.

Tu militan kone ki si u enn militan degos, u zame napa vinn defanser ideolozi “propriyete prive” dan enn sans vag kumsa. Se sa kalite erer la ki permet klas kapitalis aproppriye ek gard mwayin prodiksyon: later ek kapital ki prodwir par lafors travay tu travayer lor plizyer zenerasyon. Enn militan lagos li explik klerman ladiferans ant propriyete individiyel kikenn (kuma lakaz kikenn, so portab, so pye mang dan lakur, so brasadan) enn kote, ek seki kapitalist aproppriye pu limem ki li lerla dekret “propriyete prive”, lot kote.

Sa konsept burzwa kot fer “conflation” tu kalite “propriyete prive” ki lerla vinn “sakre”, li alabaz reyn kapitalist. Subron pa finn ezite pu propaz sa konfizyon burzwa la.

A. Subron rasir MSPA

Suvan A.Subron koz nesesite enn nuvo politik ekonomik alternativ baze lor devlopman sekter agro-indistri lor later tablisman. Dan so demagozi, li mem repran program LALIT pu enn lekonomi

alternativ. Dimunn kapav krwar li ankor LALIT. Purtan, lor terin sindikal, laverite deor. Ashok Subron pran lapenn rasir MSPA publikman. Li, personnelman, fer deklarasyon publik pu burzwazi dan MSPA tandé:

“Je tiens à rassurer la MSPA que les syndicats sont en faveur d’activités productives pour le pays à travers la canne....”
L’Express 6 Ut 2010.

Samem pli gran rev patron tablisman: pu sanze depi lindistri disik a lindistri kann.



A. Subron fye lor Navin Ramgoolam

Anmemtan ki li donn sa kalite rasirans publik a MSPA, A. Subron finn fye lor lafors Navin Ramgoolam pu so bann sipoze “viktwar” sindikal dan lindistri sikriyer. *“Ashok Subron a indiqué que le JNP avait décidé de mettre fin au mouvement de grève l’année dernière, après que le Premier Ministre l’a personnellement appelé. « Il m’avait donné sa parole que les 21 recommandations des travailleurs allaient être prises en compte par le NRB, à condition que nous mettions fin à la mobilisation de grève », explique le syndicaliste.”* (L’Express 10 Zin, 2011). Sa pankor rezud, apre 3 an.

Telman li finn bizin fye lor Ramgoolam ek PT ki li finn bizin plizyer fwa publikman remersye Nita Deerpalsing pu so sutyin politik. Dernye lokazyon ki li finn exprim so “apresyasyon” pu sa kalite sutyin politik la ti dan enn intervyu L’Express: *“D’abord, je voudrais dire que je suis mandaté par les délégués de l’industrie sucrière pour faire part de notre appréciation du positionnement de Nita Deerpalsing par rapport à la*

décision de l’ERT. Ce soutien est venu à un moment crucial.” (L’Express 18 Ut, 2012). Li finn mem fer travayer vot enn rezolisyón remersiman a Nita Deerpalsing.

Uver sime pu ERA

Bizin osi pa blyie kimanyer an 2008 A. Subron, avek kudme Bizlall kan zot ti kalson-simiz, ti donn guvernman Travayis lokazyon prezant *Employment Relations Act* ek *Employment Rights Act*, 2 lalwa zimo anti-travayer, ki muvman sindikal ti pe reysi bloke depi buku lane. Subron finn swazir sa moman la pu kas limite muvman sindikal, al form *Confederation Syndicale de Gauche* (CSG) enn kote depi leres muvman sindikal. Deswit, Guvernman finn sezi lokazyon. Kan ti pe vot sa 2 lalwa-la, CSG finn oblize al fer manifestasyon, enn kote, separe ar leres muvman sindikal.

Shifte deba lor terin “sitwayin”

Tulede fwa ki Rezistans finn met kandida dan eleksyon zeneral an 2005 ek 2010, li finn swazir pu fer so tem kanpayn elektoral vinn lor “drwa kandida pu pa met kominate lor nomination paper”. Sa de eleksyon zeneral la ti kwinsid avek enn kriz ekonomik ki ti pe amenn lisansiman ek rediksyon anplwa par milye dan lindistri sikriyer ek Zonn Frans. Sak fwa, LALIT finn met sa realite ekonomik lor azanda. Samem ki bann kapitalist na pa kapav siporte. Me, sak fwa, Ashok Subron finn okip terin “swadizan degos” ar enn size ki pa lekonomi: setadir li finn ralye tu sitwayin (inklir patrona) ansam, pu gard size selman lor rod drwa poz kandida san deklar kominate. Alor li pa etonan si zordi, ideolog burzwa pe truv li posib pu prezant A. Subron ek so “Rezistans ek Alternativ” kuma enn “alternans” a parti kapitalist tradisyonel, plito ki enn alternativ politik sosyalist.

PROBLEM SOMAZ EK LOZMAN PLI GRAV KI LI PARET

Kan Guvernman sit statistik lor problem somaz ek lozman, zot servi sif statistik ki pa ditu reflet larealite. O-kontrer zot itiliz statistik pu maske problem, plito ki pu devwal problem.

Pu biro statistik, par exanp, inkrwayab me vre, enn dimunn pa konsidere kuma enn somer si li finn fer kit kalite aktivite peyan pu omwin *enn ertan* dan semenn presedan lanket. Si kikenn finn travay dan zardin enn vwazin pandan enn ertan, mem si inn pey li an-espes, li pa enn somer. Si kikenn finn travay ti-marsan dan lari pandan enn-ertan, semenn avan lanket la, li osi, li pa somer. Si kikenn finn al lapes pandan enn ertan semann avan, li pa enn somer.

Alor si biro statistik pe donn sif otur 8% dimunn ki pena travay, li baze lor sa definisyon absoliman farfeli la. E pa zis sa. Zot pretann ki zot pe servi “definisyon ILO”. Anfet ILO dir bizin desid enn sertin nomb lertan; li pa dir sa sif ridikil enn-ertan la.

Dan realite nu kone komye dimunn bat-bate san okenn vre travay. Li buku plis ki sa sif ridikil la.

Li inkrwayab ki bann intelektyel, bann zurnalist, bann ekonomist, tu tom dan enn tel pyez pran sa sif la o-serye.

Dan lanket ki brans LALIT ti organize dan plizer landrwa an Ziyet 2013, nu finn konstat lanpler problem lanplwa. Lor 142 menaz ki nu ti vizite, parmi dimunn ki travay u kapav travay, ena pre 49% ki pa mem gayn enn peyslip. Sa vedir zot pena enn vre plas travay. Par kont, ena otur 10% ki pa travay ditu, dapre nu lanket osi. Sa sif, 49%, donn nu enn lide ki problem somaz pli grav ki sif ofisyel la.

Lozman

Lor kestyon lozman usi, propagann guvernman fer krwar ki 9 lor 10 dimunn “propriyeter

lakaz”. Sa osi, li baze lor enn fos kestyon ki zot poz dimunn kan zot fer lanket. Zot dimande sipa dimunn pey lokasyon. Si zot dir “non”, abe deswit, marke ki zot enn “propriyeter lakaz”. Me la usi, dapre lanket LALIT ti fer, nu finn konstate ki ena zis 38.9% menaz ki ena kontra lakaz lor zot nom. (Vremem ena 9 lor 10, dan nu lanket osi, ki pa pey lokasyon.) Leres menaz pe viv dan enn lakur

u lakaz familial san okenn papye. Zot pena oken proteksyon legal. Zot ni lokater, ni propriyeter. Sa, li potansyelman amenn buku kriz familyal ek konfli sosyal alinteryer lafamiy.

Dan sa kontex kriz ekonomik, Guvernman fode pa al poz dimun bann fos kestyon dan zot servey. Naturelman sa pu prodir fos sif, sif pu dir tu korek!

RODRIG PROBLEMAPRE DERNYE VWAYAZ MAURITIUS PRIDE


Dan dernye *Revi LALIT* nu ti met enn lartik konsernan dernye vwayaz Mauritius Pride, e ki so lefe pu ete lor abitan Rodrig. Pandan sa 3 dernye mwa, finn ena enn seri protestasyon depi lorganizasyon politik, sosyal ek sindikal kont sa desizyon pu aret vwayaz Mauritius Pride san ofer enn alternativ dimunn. *Mauritius Trochetia* pa ofer mem fasilité ki *Mauritius Pride* pu transport dimunn ek marsandiz, donk li pa kapav ranplas li. Dayer dan enn repons a kestyon parlmanter an Mars, Minis Baichoo finn admet ki kapasite *Mauritius Trochetia* li 108 pasaze e *Mauritius Pride* li 268. Li finn usi admet ki pri tiket *Mauritius Trochetia* pli ser ki li ti ete *Mauritius Pride*, akoz ena kabinn. Minis Baichoo finn dir ki *Mauritius Pride* ena pre 20 an e li ti anpann suvan suvan. Li finn dir ki *Mauritius Pride* pu kut environ Rs 100 milyon par lane pu repar li.

Wadire enn sel kut guvernman finn dekuver *Mauritius Pride* nepli vyab pu kontiyn desert bann lil.

Dan labsans enn transport apropriye, sa pe poz buku problem pu tu dimunn ki bizin ale-vini ant Moris ek Rodrig. Dayer pri tiket lor *Mauritius Pride* ti abordab pu etidyan, travayer e pu ti-prodikter dan Rodrig ki bizin transport marsandiz ant Moris ek Rodrig.

Elver dan Rodrig pe fer fas a problem, zanimo ki sipoze pe exporte ver Moris pe bloke dan Rodrig akoz *Trochetia* pa finn ekipe pu sarye zanimo.

Pu repons Baichoo, get: <http://mauritiusassembly.gov.mu/English/hansard/Documents/2014/hansard0114.pdf>



KANPAYN AKSANTYE PU FERM BAZ DIEGO GARCIA

Amezir stratezi legal Ollivier Bancoult pe zwenn tase, lezot metod amenn lalit pe aksantye. Anfet, *Grup Refizye Chagos* finn perdi lapel divan *Appeal Court* dan Lond, kot zot ti pe konteste desizyon Guvernman Britanik pu kree enn park marin (*Marine Protected Area*) otur Chagos. Sa Park Marin la evida man exklir Diego Garcia, parski li ti pu enn absirdite pu inklir baz militer Diego Garcia avek tu so dese nikleer dan sa konplo Britanik la.

Stratezi legal erinte

Sa Lakur Dapel la pa finn retenir argiman GRC, e finn deklare ki MPA Chagos pa reprezent enn vyolasyon Trete Linyon Eropein. Sel pwin dan zizman ki finn satisfer dirizan GRC se lefet ki Lakur la finn aksepte ki dokiman diplomatik konfidansyel ek sekre ki WikiLeaks finn expoze, zot anfet admisib dan Lakur.

Sa defet GRC divan lakur dapel UK pe vinn ankor en fwa expoz febles stratezi dirizan GRC ek zot lekip legal pu fye zis lor zidisyer pu enn problem eminaman politik ek kolonyal. Malgre sa defet la GRC ankor pe pans pu persiste

ar ka lakur e pe get posibilite fer lapel divan Lakur Siprem UK.

Dan LALIT nu finn tultan averti lor febles servi lakur, setadir sime zidisyer, kuma mwayin privilezye pu amenn lalit lor Chagos e Diego. Nu panse ki li pli importan ek efikas pu amenn kanpayn mobilizasyon parmi lamas dimunn Moris, inkli Chagosyin, e pu devlop sutyin rezyonal ek internasional kont leta UK ek US. Alor, nu pe tuzur travay e fer kanpayn ansam ar lezot lorganizasyon, zordi dan “Komite Diego”. Lalit ansam ar lorganizasyon sindikal, grup kartye, lasosyasyon fam pe amenn lalit lor baz trwa pwin ki interlye: re-inifikasiyon teritwar Moris, fermtir baz militer lor Diego, drwa pu tu Chagosyin return Chagos. Lakle dan nu stratezi se fermtir baz US lor Diego. Sa li parski san fermtir baz, teritwar Moris pu res demanbre ek su lokipasyon militer. Tank ki ena baz militer lor Diego, sufrans Chagosyin kontinye. San ferm baz, pa pu ena ni veritab drwa de retur Chagos, ni ful reparasyon pu ditor ki Leta Britanik ek Amerikin finn fer zot sibir, ni okenn vre re-inifikasiyon pei.

Ka UNCLOS

Kote guvernman PT-PMSD, ziska ler li pena enn stratezi kler kimanyer ogmant presyon lor leta UK ek US pu fors zot lev pake ale depi Diego ek Chagos.

Li vre ki Moris finn met ka, ki pe tuzur derule, kont guvernman Britanik lor Park Marin otur Chagos divan lakur Nasyon Zini lor Drwa Lamer (UNCLOS). Ti ena seans Lakur pandan mwa Me dan Istanbul, Latirki. Moris ti reprezante par Milan Meetarban ek enn lekip avoka Parke, tandi ki Angle finn avoy so Attorney Jeneral anpersonn pu reprezant li divan sa Lakur la. Prose la ti derul wiklo, setadir publik pena akse. Guvernman Britanik finn depoz plizir dokiman lor dosye Chagos ki aster aksesib a publik. Lakur UNCLOS pu donn so desizyon ant mwa Ut ek Novam 2014.

Anretan dan kad nu kanpayn, LALIT finn ekrir Minis Boolell pu dimann Guvernman etablir enn ‘road map’ pu aret sa lokipasyon militer ek kolonizasyon teritwar Moris la par inperialis US ek so alye leta UK. Get nu let e repons Minis Boolell ki swiv dan Revi.



LALIT PROPOZ GUVERNMAN ENN

ROAD MAP KONT BAZ DIEGO EK CHAGOS

Dan kontex negosyasyon ant UK ek USA pu renuvelman bay lor Diego, LALIT finn ekrir Minis Zafer Etranzer, Arvin Boolell pu dimann Guvernman vinn delavan ar enn ‘road map’ ki viz pu aret sa lokipasyon ilegal ek kolonizasyon kontinye teritwar Moris par inperyalis US ek so alye UK. *LALIT* finn fer 5 propozisyon pu sa Road map la. Minis Boolell finn avoy enn repons par so ipad, enn repons bankal. (get let LALIT ek repons Minis Boolell pli anba)

Hon. Dr. Arvin Boolell,
Minister of Foreign Affairs,
Port Louis.
Date: 18 March, 2014

Dear Sir,

RE: LALIT PROPOSES “ROAD MAP” ON DIEGO GARCIA AND CHAGOS

As the illegal lease between the UK and USA on Diego Garcia is being negotiated for renewal for another 20 years, we in LALIT believe that it is a propitious time for the Mauritian government to act. It is time for a “Road Map”. LALIT is proposing Government one.

The aim of the road map is multiple: to end the UK’s illegal dismembering of Mauritian territory which was a *null and void* condition for Independence, and to end the continued illegal British occupation of its phantom colony BIOT, which is nothing other than Mauritian land and sea; and to close down the supposed “communications station” that the UK-US set up there, which turned out to be an outrageous military base on Diego Garcia, a base that now stocks nuclear materials and services nuclear submarines; and to organize to end the brutally engineered exile of the entire Chagossian people, so that they can return to the Chagos, heads held high, as Mauritians. The Mauritian government should seize this moment to proceed towards the complete decolonization of the Mauritius, including Chagos.

It is only by principled action that Mauritius can hope to re-unify its territory and its people; hope to get the military base on Diego Garcia closed down so that this land of ours is no longer used for aggression against States on which Mauritius has not declared war; and, importantly, hope to bring an end to the profound suffering of all the Chagossians, and to do this by creating the necessary conditions for their right to return to Chagos as Mauritians.

As you are aware the original 50-year illegal lease between the British “thief” and the US “receiver of stolen goods”, expires in 2016. Negotiations for its renewal are due to start, according to the original lease, this year. It is now generally known that the UK and US are already involved in further devious “manoeuvres”; they are now extracting collusion from those UK-based Chagossians who do not recognize Mauritain sovereignty over the Chagos, while offering them a bribe of settlement and work on the Diego Garcia military base. All this is being done behind the backs of the Mauritian authorities and the entire Mauritian people, including Chagossians. We commend your stand on the issue of the British Minister’s recent visit to Chagos behind the Mauritian Government’s back. But stands must be coherent, principled and consistent. We call on Government, for example, at the same time to put a stop to the sale of rocks and any commodities to the US and UK occupation forces on Diego and Chagos.

Here is the Road Map that LALIT proposes:

1. That the Mauritian Government continue with the UNCLOS case against Britain to get the fake colonial “Marine Protected Area” declared illegal.
2. At the same time, the Mauritius State must at once start procedures to inscribe a resolution on the Chagos/Diego Garcia issue on the agenda of this year’s UN General Assembly to get backing for the request for an “advisory opinion” at the UN International Court of Justice (ICJ) at the Hague. The Mauritian Government should simultaneously seek the diplomatic support of regional bodies such as the COI, African Union, COMESA and the SADC as well as countries in the Commonwealth and ex-Non-Aligned Movement, on the Chagos/Diego Garcia issue. In

Once a resolution has been voted at the UN General Assembly, this gives Mauritius the necessary strength to put a case against Britain for an ‘advisory opinion’ on the dismembering of the country and the continued military occupation of Mauritius. Such an opinion by this prestigious international court has immense political weight and would be a strong tool in the hands of Mauritius as well as anti-colonial and anti-military-bases movements to internationalize the campaign for the re-unification of Mauritian territory, for the closure and dismantling of the US nuclear base on Diego Garcia and for the right of return to be won in full dignity for all Chagossians.

3. Mauritius must remind the world that the Seychelles claimed back and won its Islands illegally bundled into BIOT prior to Independence and that this was done with the legal help of a Mauritian, the late Rajsoomer Lallah.

4. That Mauritius, being a member of the Secretariat under the Pelindaba Treaty for a Nuclear-Arms Free Africa (AFCONE) should call at once for UN (IAEA) inspections on Diego Garcia, to check for compliance with this Treaty. The call for inspections can be launched at next week’s 24-27 March meeting which we hear will be held in Mauritius.

5. To constantly, during all bilateral and multi-lateral work that Mauritius undertakes, draw international attention to the military occupation of Chagos/Diego Garcia and its human toll on Chagossians. To continue to call for support for the UN resolution to make the Indian Ocean a Peace Zone.

6. After the article in *The Independent* last week about the dumping of waste in the Diego Garcia lagoon, it is important that as well as getting the base closed down, that a proper clean-up of the sea be instituted, at the expense of the UK and USA Governments. We propose that the Mauritian Government calls for the UK and US to tax Corporations that supply the US military.

7. That the Mauritian Government constantly act and legislate in ways that visibly include the Chagos as part of Mauritius. We re-iterate our proposal, for example, for a Constituency for Chagossians in the context of all Electoral Reform proposals. All Ministries must be involved in this process of continually defining the country of Mauritius not as “an Island” or “I’lle Maurice” but as a series of islands, including Diego Garcia and the whole of Chagos.

8. That the Mauritian Government remember to quote US President Obama and UK Prime Minister David Cameron who have both declared the Sunday referendum in the Crimea “illegal”, when the UK and US, at some point, as their last-ditch fall-back option, will no doubt call for an even less “legal” referendum amongst Chagossians.

Yours sincerely,

Alain Ah-Vee, for LALIT
Copy to The Press

Repons Minis Boolell

Dear Mr AhVee,

Thank you for your views and we have gone well beyond the awe inspiring proposals Lalit is making. On the issue of inspectoral visit by IAEA the matter has to be taken up in the UNSC. The request for an advisory opinion from ICJ does not arise for two main reasons:

- a) legal advice tendered by experts run contrary to the layman’s interpretation
- b) several resolutions to garner support from like-minded countries and the International Community.

As a whole, several resolutions have been moved in relevant regional and multilateral forums. The lobbying strategy is well structured and hinges on three pillars: political, legal and diplomatic.

Yours sincerely,
Arvin Boolell, Sent from my iPad

LALIT AN-AKSYON

Disribisyon trak lor lagar

Le 21 ek 22 Me, militan LALIT ti lor lagar Victoria ek Lagar di-Nor Port-Louis, Lagar Rose-Hill ek Curepipe, kot La Louise, Lagar Mahebourg ek karfur Beau Vallon plis lor plizyer sayt travay, pe distribiye trak pu averti kont lalyans ubyin koalisyon PT-MMM lor ledo klas travayer. Se sa trak ki nu finn distribiye ki finn vinn nu Editorial dan sa Revi-la.

Notis Kart Id

An Mars, militan LALIT ti distribiye enn notis a anplwaye tu sa 14 sant konversyon Kart ID dan Moris pu averti sa bann ofisye la lor responsabilite ki zot sarye kan zot pa inform dimunn lor laspe represif sa kart ID biometrik la. Nu finn remarke ki, dan lake aplikasyon ek lake sers kart, pa ti ena okenn dimunn ki anfaver sa kart ID la. Partu kot nu finn ale, dimunn ti pe ankoler kont kart la. Li montre a ki pwin li fos pu dir ki dimunn ki tir kart ID biometrik “anfaver”. Ena nu Notis plis lartik dan Revi.

Road Map Diego ek Chagos

LALIT finn propoz enn nuvo “roadmap”, enn nuvo stratezi politik a guvernman pu Diego ek Chagos. Nu finn avoy nu propozisyon a Minis Boolell ki finn reponn. U kapav lir detay lor nu roadmap ek repons Minis Boolell dan Revi.

Pozisyon lor Reform Elektoral

Nu *White Paper* alternativ lor reform elektoral ki nu ti tire avan *Consultation Paper* Ramgoolam finn deklans buku deba. Plizyer manb LALIT finn partisip dan deba lor radyo ek lagazet pu explik nu bann propozisyon. Dan enn sel semenn 4 manb LALIT ti lor long program Radyo. Kan *Consultation Paper* Ramgoolam sorti ti deza ena enn nivo konsyans lor ki ete demokrasi

enpe pli ot dan pei gras-a nu *White Paper* alternativ. Byin vit, mem editorialist finn bizin admet ki reform Ramgoolam pa pu aprofondi demokrasi ni aboli kominalism dan prosesis eleksyon ek formasyon Parlman. Me, zot re-bliye parfwa.

Kozri avek etidyan

Manb LALIT, Alain Ah-Vee ti invite pu koz avek etidyan lor lagrev etidyan Me '75 dan enn kolez P.Wilhems. Etidyan prezan finn ovasyonn LALIT pu nu persistans ek konsistans dan lalit kont sistem kapitalism lor letan. Sa swiv kozri 2 lezot manb dan diferan kolez, setadir Rajni Lallah ek Lindsey Collen.

Ledikasyon Politik

Lor demand enn gran lasosasyon, LALIT finn anim enn seri kur ledikasyon politik dan Port Louis depi Mars. Ena enn 25 dimunn finn partisipe sak fwa. Deba dan sa bann kur la finn enn nivo eksepsyonal, preske kuma enn Kongre plito ki enn kur. Tem ki finn kuver inkir listwar klas travayer, listwar burzwazi, enn kritik lor model konsansis pu get sisyete, ek ki ete Leta. Prosenn pu lor Reform Elektoral.

Sesyon lor Kapital Finansye

Apartir Mars, tule 15enn, LALIT ti organiz 5 sesyon lor “Kapital Finansye”, ki infliyans politik zordi. Nu ti kumanse ar vole istorik, setadir analiz Lenin lor kimanyer, amezir kapitalism ariv so “stad suprem” kot li vinn inperialist, kapitalism *finansye* kumans vinn dominan parmi diferan sekter kapital. Apre sa, nu ti get rol ideolozi neo-liberalist, ek travay politik par Reagan ek Thatcher, dan re-met kapital finansye o-puvwar pu dezyem fwa, lepok zordi. Sa minmiz kapital finansye finn provok kriz finansye 2007-2008, ki nu finn analize. Nu finn termine ar enn

sesyon pu get natir kapital finansye dan Moris. Militan LALIT finn truv li enn priyorite pu partisip dan sa bann sesyon la e finn tutswit rekonet so linportans politik. Nu pe viv dan enn lepok kot sak militan bizin konpran natir kapital finansye pu ki li enn bon militan..

Delegasyon Larenyon

An Avril, LALIT finn ena rankont dan Lareynion avek trwa organizasyon independantis dan Larenyon. Seki interesan ladan, se ki sa trwa organizasyon la zot kuver trwa zenerasyon. Ena organizasyon de-long dat ki finn milite pu Lindepandans otur Serge Sinamalay. Ena organizasyon lagos ki anmemtan pe milite pu sosyalism e ki anmemtan independantis. Ena organizasyon zenn. Li kumadir enn renesans volonte independantis dan Lareynon amezir kriz ekonomik morde. (Get lartik lor sa size-la dan Revi).

Marxism 2014 Lostrali

An Avril, kamarad Rada Kistnamsamy finn al Lostrali lor nom LALIT, pu partisip dan enn Konferans. Li ti prezant enn papye lor lalit pu sosyalism Moris avek lanfaz lor lalit kont baz militer Diego. *Marxism 2014* ti organize par *Socialist Alternative*. Deba politik ti enn nivo byin ot. Sa konferans-la ti enn lokazyon osi pu devlop lyin avek organizasyon dan rezyon Lazi.

Lasanble Manb LALIT

Manb LALIT depi tu rezyonal ek brans ti zwenn an Avril pu diskit sityasyon politik volatil ki pe ena pu lemoman. Nu bi dan sa Lasanble Manb-la sete pu konpran sityasyon politik ase byin pu ki nu kapav devlop nu stratezi ek taktik politik pli byin. Diskisyon finn ek pe kontinye dan tu brans.

DISKUR PREMYE ME LALIT

“INTERNASYONALISM, PA NASYONALISM”

Sak lane, enn manb dirizan LALIT pran laparol lor tem swazire pu selebre Fet Travay. Sa lane la Lindsey Collen ti pran laparol lor danze nasyonalism ubyin Morisyanism enn zur Fet Travay. Li permet klas kapitalis rant dan vant muvman travayer.

Mo salye 2 kamarad ki pe prezide lor nom LALIT. Mo exprim apresasyon osi pu sa lamizik extra-ordiner ki nu fek ekute. Bonn Fet Travay, tu kamarad prezan zordi. Nu tem zordi li “Internasyonalism, pa nasyonalism!”

Introduksyon

Sa *Fet Travay* zordi la truv Parti Travayis ek MMM, 2 parti ki ti anfet ne dan klas travayer - dan 2 lepok kot klas travayer finn fer sulevman - tulde parti zordi inkapab fer zot miting anyel. Depi enn 15-20 an, zot pa kapav reyni travayer san brayb kuma piknik, biriyani, etc. E, zordi petet zot pa kapav get klas travayer an-fas antan ki klas. Alor, nu bizin gete ki finn arive pu ki Parti Travayis ki ti ne dan klas travayer an 1936 me ki zordi kareman reprezant lintere lekontrer, lintere kapitalist. E nu bizin gete ki finn arive pu ki MMM ki, li osi, ti ne dan klas travayer enpe plis ki 30 lane apre Travayis, me li osi kareman reprezant lintere kapitalist zordi. Tulde anonse ki zot pe kennsel zot miting, mem apre ki zot manb fini al kol lafis partu dan pei. Mem si li pa ti so lider Paul Bérenger ki anonse pe kennsel miting MMM, me Navin Ramgoolam, lider Labour, ki anonse ki miting MMM kennsel! [Lodyans rие!] Sakenn kapav favoriz diferan seksyon burzwazi, ki parfwa an-ger: Parti Travayis pli reprezant seki emerzan, burzwazi deta, tandi ki MMM inn ariv reprezant seki deza ti angr ese par travay su kad legal esklavaz ek kad legal langazman; me tulde reprezant lintere totalite burzwazi.

Nu bizin get byin lwin deryer nu, dan listwar, *pu ki nu pa repet mem erer, pa tom dan mem pyez istorik* ki Labour ek MMM.

Alor, anu kumans par sa, parski li daktyalite zordi.

Travayis, ti ena so premye 10an lavi kuma enn parti *klas travayer*. Lerla enn grup gran komers-an, gro planter (proprieter 200 arpan, mo pe koze, me ki pena mulin), enn seri profesyonel anbisye, ti regrupe otur enn lagazet apel *Advance*, pu “*advance*” zot klas, fer li vinn enn gran burzwazi. Zot lider ti Seewo-sagur Ramgoolam. Zot finn rant dan Parti Travayis, e zot finn byin vit pran ladireksyon. Plitar, enn lot grup dan burzwazi otur lagazet *L'Express*, ti fer mem zafer, rante, pran kontrol ansam ar Ramgoolam Per. Alor, li kler: kan u les grup organize dan klas sosyal pli for ki klas travayer rante dan u parti, zot pu pran kontrol.

MMM, 40 plitar, mem zafer. Ladireksyon MMM an 1981, inpoz enn lalyans ar PSM lor manb MMM. (Pa tro differan depi metod pe servi zordi pu sey inpoz lalyans ar PT.) PSM ti reprezant gran planter, profesyonel, komers-an, otur enn lider apel Harish Boodhoo. Alor, MMM alye ar enn seksyon burzwazi montan, ki ti dan PT avan. E, anmemtan, MMM ti anfet kareman fer enn lalyans ar burzwazi. Li ti apel sa so “Nuvo Konsansis Sosyal”. Dan lespas 1-2 banane, burzwazi istorik fini ramas MMM, garde. Ziska zordi. Taler mo pu re-vinn lor sa kalite problem de klas la, dan kontex zordi.

Partu dan Lemond

Sa *Fet Travay* zordi la pe selebre, pe fete, partu-partu dan lemond. E li pa zis pe selebre par travayer ki pe travay dan so prop pei. Li enn lepok zordi, kot travayer par milyon pe travay dan enn lot pei. Ena 38 milyon dimunn USA zordi

ki pa ti ne dan USA. Ena 15 a 20 milyon travayer pe travay kuma “migran” lor kontra 3-an zis dan pei Larabi ek Golf. Taler nu re-vinn lor la, osi.

Ki ete “travay” ki nu pe selebre?

Partu se klas travayer ki pe mark sa zurne la, antan ki klas.

E ki nu pe anfet selebre? Nu pe selebre *travay*. Alor, zordi nu pu get an-profonder ki sa vedir “travay” e kifer nu pe selebre li. Ki ete “travay”?

Bi profon, rezon vreman profon kifer LALIT zordi pe selebre “travay” se pu re-inifye tu imin. Sa paret drol: nu pe selebre zis antan ki enn sel klas (travayer) avek bi pu re-inifye limanite an antye. E nu pe reyni *kont klas ki kontrol kapital*. Anfet, seki pu inifye nu enn zur, se pa nu nasyonalite, me nu limanite. E, kan byin gete, ki zafer ki definir nu limanite? Ki rann nu differan depi tu lezot kreatir dan lanatir?

Li anfet sirtu nu langaz naturel, nu langaz maternel, setadir nu zuti naturel pu refleksyon. Samem ki differansye nu depi lezot zanimo lor bul later. Nu langaz, e liye ar li, nu kapasite ansam pu kree enn plan, met li an-pratik atraver nu prop travay.

Mo redir sa, si u permet mwa: atraver nu zuti refleksyon ek planifikasyon (setadir nu langaz maternel), nu kapav sanz lemond otur nu. E nu fer sa sirtu atraver *prodir nuvo zafer*. E nu prodir nuvo zafer sirtu atraver “travay”. Alor, nu travay se nu fason pran nu plan ki nu finn devlope – nu kapav devlop enn tel plan akoz nu ena sa kapasite lingwistik la, sa zuti refleksyon la – e fer li vinn reyel – avek nu travay.

Tusala li inifye: refleksyon, diskisyon, plan swa program,

aksyon swa travay pu met li anpratik.

E tu dimunn, dimunn ki ti fer tusala, zot osi, lontan, *zot* ti inifye, lepok byin avan.

Isi mo pu dimann u mazinn enn som larzan pu sak sif mo mansyone, pu ki kapav konpar komye lane mo pe koze, sinon, li difisil mazine.

95% nu listwar, nu egaliter

95% listwar limanite, imin ti nomad, san stok, egaliter; ti dres plan, travay ansam

Imin finn existe dizon enn 200,000 lane. Enn nonb lane sinifikatif. Pandan tut-long sa lepok la, 200,000 an, nu ti viv dan 4 fason inifye, kot zordi nu viv dan fraktir, dan kasir.

1. Bul later ti enn sel, inifye

Premye pwin. Nu ti lib pu vwayaz atraver later partu, lib. Pa ti ena frontyer. Pa ti ena pei. Pa ti ena nasyon. Pa ti ena nasyonalite.

E nu tu ti nomad.

2. Mem-mem dimunn reflesi, planifye, mem-mem dimunn fer travay la pu fer plan vinn vre

Dezyem, nu tu ti servi nu langaz imin, setadir nu zuti refleksyon, pu dres bann plan, ki nu finn travay pu met an-aksyon. Tu inifye ansam. Ansam ti reflesi ek diskite: Ki rasinn pu fuye, ki fri pu kase ki lepok, kot pu lapes ar ki labwet, kot pu gayn ris-dimyel, kimanyer lasas diferan zanimo, ki plant servi pu pwazon pu tramp twint nu fles, ki plant servi kuma medsin. Diskite ansam, fer travay ansam. Manze ansam. Partaze. (Konpar sa ek travay zordi: zordi enn dimunn, misye la, dir nu ki pu fer, li tir plan. Nu ena zis pu fer seki li dir nu fer.)

3. Inifye ar lanatir

Trwazyem, nu ti inifye dan sans ki nu ti form parti dan lanatir. Nu anfet enn kreatir naturel, parey kuma tu zanimo. A lepok, nu ti *bizin* konpran lanatir, predir zafer, protez lanvironnman, debruy ladan. Nu ti inifye ar lanatir.

4. San klas, egalite de klas

Katriyem, e li importan pu Fet Travay ki nu pe fete zordi, nu pa ti kase an differan klas. Nu tu ti egal. Nu tu ti partaz tu. Nu pa ti ena stok. Omwin nu pa ti ena stok pu, dizon, enn-de semenn.

Fraktir ant nomad ek agrikilter ki prodir sirplis

Premye gran kasir, gran fraktir, vini 5,000 - 10,000 banane desela. Setadir, inpe fek-la. Enn parti dimunn, grandisan, inn vinn sedanter, nepli nomad. Zot finn dekuver lagrikiltir, setadir lelvaz, plantasyon. Zot finn kumans, par travay, prodir enn sirplis. Zot finn devlop enn stok. Par definisyon, lagrikiltir lor letan, li bizin stok. An Angle, mo “stock”, vedir e “stok” e “betay”. Pu plantasyon, oblize gard enn par stok pu ki ena semans lot sezon, non?

Fraktir ant seki kontrol sirplis ek seki travay

Sa premye kasir la finn vinn deklans dezyem kasir – e li importan pu not sa zordi, zur fet travay – setadir sosyete finn kas an-de: Bann seki kontrol stok (enn ti-grup) ek bann seki prodire stok (enn imans grup). Alor, partu dan lemond, kumans gayn “faraon dan Lezip”, “warlords” an Sinn, zaminndar dan Lend, nob ek seyner ek Vatikan dan Lerop, sef tribi an Afrik.

Alor, partu kot ena sosyete sedanter, gayn pret (enn klas ki interpret seki “bondye ule”) plis nob (“gran-nasyon” par nesans, par disan) ki angrese.

E ant sa bann sosyete gayn enn klas komersan, ase nomadik, ki aste isi, vwayaze, al vande laba. Sa klas la osi vinn ris. Li mem kumans pret larzan ar nob ki lager antre-zot.

Sa lepok la, frontyer ena. Me konsep “nasyon” pa ti ankor pran nesans.

Sa zar sosyete la, ti res pliz-u-mwin stab pandan 5,000 a 10,000 dernye lane: enn parti dimunn (ki pe raptise) ki ti pe res nomad, inifye dan limem (mem si kase

depi lezot), san frontyer (mem si lezot pe kumans met lame lor later, anserkle later, fors nomad mont lor flan montayn, al dan but dezer, al dan fon lafore). Enn lot parti dimunn ki res anplas, dan enn yerarsi, ki nu kapav apel “feodal”.

Lerla, ep!

Ep!

Kapitalism pran puvwar

Zis 250 an desela, (konpar sa ek listwar limanite dizon 200,000 an, ek listwar sosyete agrikol ek irbin, 5,000 – 10,000 an) enn nuvo klas, ki ti’nn burzone (sa mem apel li “burzwazi”) pandan zis 100 - 200 banane, depi enn lalyans ant sertin sa bann nob la plis sertin sa bann komersan ris la. Sa nuvo klas la finn devlope vit-vit, e li finn pran puvwar. 250 an desela, selman: klas kapitalist.

An Frans par examp, burzwazi (klas kapitalist) pran puvwar par so latet lerwa-larenn. Nu pe koz ki lane? 1793. Komye lane desela? Zis 221 an!

Sa burzwazi la, sa nuvo klas ki finn burzone dan Lerop la, ki li ti’nn fer pu li vinn for, li?

Li ti reysi fer enn nuvo zafer net. Zame pa ti tann sa avan. Ti kumanse an Angleter dan bann lane 1750. Seki pu vinn enn burzwa (enn kapitalist), li pran enn gro godam, sipa enn lasal. Li invit dimunn ladan. Li koste zuti, masinnri enpe elemanter, ladan. E li aste kuraz ar sa bann dimunn la. Zame pa ti ena sa laranzman la avan. Li dir, “Ala mo lizinn. Ala mo masinn. Mo aste u kuraz! U lib. Met u pri!” U, etan done u fini lasas depi later nuriser depi enn-de syek petet, etan done u fini expropriye, u pena swa, ki u fer? U dakor. U vann u kuraz. Rupi latonn. Rupi balo. Rupi golet. Rupi zurne. Rupi lasemenn. Rupi par mwa. E li, sa burzwa la, kan li aste u kuraz, li revann prodwi ki u finn fer ar u *kuraz travay*, li gard profi la. Sa klas la, ziska zordi, li apel “burzwazi”.

Ubyin “kapitalist”, parski li fini met so grapin lor sa sirplis, sa

“stok” la, ki osi apel “kaptal”.”Kapital” vedir “stok”. Klas la osi apel “patrona”. Parfwa “anplwayer”.

Sa lepok la, imin fraktire depi lanatir

Dan sa lepok indistrializasyon ek lamonte kapitalism, nu anbark lor enn fraktir danzere net. Nu fraktire depi lanatir. E nu fraktir lanatir limem. Nu fer piyaz. Nu ranpli ler ek lamer ar karbonn. Nu resof planet la. Nu kas tu sa sikl naturel ki existe. Nu riske fini loxizenn. Nu riske polye lamer. Klima mem menase ar sanzman ireversib. Nu riske rwinn sistem klimatik.

Listwar Moris an 3 parti, konsernan kad legal pu “travay”

Briyevman, pu Moris, anterm letan, nu get li vit-vit.

Nu zordi, *travayer* ki pe selebre Fet Travay, nu desandan esklav, nu tu, e nu desandan travayer angaze, nu tu. Mo pa pe koz disan, non. Mo pe koz kad legal pu sistem ekonomik sak lepok.

Premye 100 banane listwar Moris, lalwa travay ti rezi par enn sistem organize par Leta apel “esklavaz”.


Dezyem 100 banane, lalwa travay ti rezi par enn lot sistem organize par Leta apel langazman.

Trwazyem 100 banane, li sa sistem vann nu kuraz la.

Ala kot nu ete zordi. Nu pe travay dan enn kad ki pli sup ki esklavaz, pli sup ki langazman, me li tuzur enn form esklavaz. Nu ankor ladan-mem. Nu vann 1/3 a 1/2 nu lavi, par ertan. Pu enn buse manze! Pu nu sirviv, pu al travay an-dime, re-vann nu kuraz.

Burzwazi met dibut “Leta nasyon”

Me, pu return ar sa bann burzwa, kan zot kumans sa sistem fer dimunn vann so kuraz. Pu zot organiz sa lor enn gran lesel, zot bizin met ar bann nob ki ti gard dimunn lor so terin kuma “peyzan



Desin Alfred Kubin, *L'Etat*, 1901

san later”, kuma servant, kuma dan servis militer, servis sivil, etc. Alor burzwazi ti bizin enn lot kalite Leta, pu li. Lerwa Larenn, sipa reyn relizye, pa ti pu kapav organiz sa sistem vann kuraz. Alor, burzwazi ki met dibut bann “Leta Nasyon”. Ala frontyer kumans sele. Ala kumans gayn differan “nasyon”. Ala “nasyonalite”, “nasyonalism”, “patriotism” kumanse.

Par examp, Napoleon ti inifye Lafrans kumansman bann lane 1800, Bismarck finn “inifye Lalmayn” (1860) – ase fek la, sa, Garibaldi mem lepok dan Litali. *Leta Nasyon*, li zuti burzwazi pu li reyne.

Tu klas travayer, amizir dekolonize, finn tom, enn apre lot, dan latrap nasyonalism kan pe al ver Lindepandans. “*Nation building*”, se travay par exselans burzwazi! U pu truve kot mo pe vini. Kifer nu dan LALIT nu dir “Internasyonalism, pa nasyonalism!”

E u pu remarke osi ki, sirtu dan sa lepok globalizasyon, kot travayer pe deplizanpli travay dan enn pei kot li pena okenn drwa politik, ni sivil, li zis pey tax (TVA, etc), san ki li ena okenn reprezentasyon dan sa Leta Nasyon kot li travay.

Me, kapitalis osi met dibut enn nuvo klas: klas travayer

Klas travayer, osito li kree, li kumans realize ki li enn klas. Li devlop konsyans de klas.

Fet Travay

Kumsa ki depi 100an partu dan lemond, e depi 70 an dan Moris, travayer gard 1 Me, pu selebre “travay”. Pu selebre nu valer intrinzik, antan ki enn travayer, ek antan ki enn *imin*. Pu mark linportans ek itilite nu kapasite transform lemond. E kan nu zwenn pu selebre, nu pran pozisyon *KONT* burzwazi. Li pli for, alor nu oblize kont-kare li ek so sistem, ki pe gard nu su enn form esklavaz, kot nu limanite fraktire.

Alor, nu pe *viz* konfli ar patrona, burzwazi, kapitalist – ek ar so reprezantan politik. Zordi li kler sa bann reprezantan la se PT, MMM, MSM ek PMSD. E zordi zot tu finn anil zot miting 1 Me. Li enn zur kot zot pe kas sa dernye lyin ki PT ek MMM ti ena ar klas travayer, klas dan lekel zot ti ne: zot finn kennel zot miting zur Fet Travay. Me, depi lontan, zot pena program anfaver travayer, zot pena prinsip travay ki neseser pu evre pu sosyalism. Zot pena onete intelektyel. Zot viz puvwar, zis pu zot ena puvwar.

Alor, zordi, kan pu ena enn ta presyon tu kalite lor nu, dan LALIT, pu fer kit kalite lalyans ar Bizlall ek/ ubyin Subron. E presyon li la, mem sa 2 la pe lager sat-lisyin antre-zot tu dernyeman. Mo oblize nom zot par zot nom e pa par nom zot regrupman politik, parski zot fer enn amalgamasyon total ant zot travay popilist dan sindika, zot tulde, ek sa muvman politik kot zot sakenn enn kordilo.

Me, get problem: Deza, zot apenn forme kuma Parti Politik, zot tulde invit “sitwayin” dan zot miting. Me, “sitwayin” se tu dimunn. Patron, li sitwayin, li. Kapitalis, li sitwayin, li. Burzuala, li sitwayin la. Misye la, li sitwayin. Anplwayer li sitwayin. Alor, zot pe fini invit lennmi dan zot ran. Deza. Parey kuma PT ek MMM ti fer apre ki zot ti deza fini vinn for. Me, tandi ki PT ek MMM ti vreman uver zot a sa *take-over* la apre 10 an, respektivman, dan zot nesans mem Subron ek Bizlall pe invit patrona.

Alor, nu dan LALIT, nu la, pu selebre nu “travay”, antan ki imin ki ena sa kapasite servi langaz maternel kuma zuti refleksyon, mazinn ek met an-pratik enn plan ubyin enn program – parey kuma nu travay pu prodir tu seki sosyete imin bizin – e travay ansam pu pu fer nu program vinn vre. Nu osi la, antan ki travayer, pu selebre “travay” kont kapital. Nu napa la kuma “sitwayin” ubyin “Morisyin”, non. Nu pa nasyonalist. O-kontrer.

Lepok globalizasyon, ena par milyon travayer ki pa dan pei kot zot sipoze patriotik, sipa nasyonalist. Ena par milyon Indyin dan Larabi. Ena par milyon Haysyin dan Leta Zini, Kanada, Lafrans. An zeneral, travayer pa ditu lib pu “al travay” ayer, non. Kapital li lib, li. Kapital Moris fini al dan enn seri pei Lafrik, Lazi, Madagascar. Ena kapital lot pei inn met sipermarse ki pe tuy buku labutik lokal. Kapital lib. Me, travayer? Patron pas komann pu nu. Li bizin tan mil travayer depi tel pei. Kanada pu les tan rantre. Purvi li “sirkilyer” setadir u ale pare u kontra.

Limanile san frontyer

Abe, pu fet travay, nu bizin fet nu limanite an-komin, enn limanite ki ti bizin re-vinn lib depi bann frontyer Leta Nasyon.

Nu bizin fet sa “travay” ki nu fer. E nu bi se pu “liber nu travay”, fer li re-liye ar nu prop refleksyon, refleksyon ki nu fer

ar nu zuti naturel: nu langaz maternel, seki permet nu, par enn zefor intelektyel, konpran zafer, dres enn plan, e, ansam, met li anpratik.

Parfwa kan u “azute ansam” ar kiksoz, sa kiksoz li anfet “retire” depi u lafors

Me, avan nu vinn lor nu program, u kone, dimunn fer enn lot erer. Kapav u kapav azut ansam elekter Travayis ek elekter MMM ek elekter MSM ek gayn enn total inpresyonan. Me, dan lagos, dan enn parti ki lor enn program anfaver klas travayer, li riske lekontrer. Si dimunn truv LALIT mars ar Subron, e si zot kone li finn al zir afidavit, zire su serman, ki li pa pu remet ankestyon Best Loser System par so ka lakur, e lerla andeor li pretann li-mem sef jaz dan lalit kont Best Loser System, abe li pu fer LALIT gayn mwins sutyin ki nu ti pu gayne tusel. So lafors, li napa azute ar pu LALIT. Li retire depi pu LALIT.

Nu lafors, dan LALIT, e li vre pu tu parti klas travayer ki pe lite pu ranvers sosyete-de-klas ek amenn sosyalism, li rezid dan nu koerans. Li rezid dan nu onete intelektyel, dan nu program kler, dan nu prinsip organizasyonel. Si nu ipotek sa, abe nu pu afebl anplas. Pli vit ki Travayis ti fer li, pli vit ki MMM ti fer li, nu pu vinn su kontrol burzwazi mem. Alor, nu bizin ena nu lide kler lor dezavantaz sertin lalyans.

Program


Kan nu koz enn “plan” ki nu kapav kree par, ansam, servi nu zuti naturel, nu langaz maternel, nu pe ant-ot, koz lor enn “program”. Enn Program Politik, se enn Plan. Li baze lor 3 zafer, enn analiz realite dan so muvans istorik, enn seri demand (revandikasyon profon), ek enn popularizasyon (atraver nu langaz imin, naturel ankor enn fwa) sa bann lide lor kimanyer ariv enn meyer sosyete la. Alor, enn program li kuma enn pon ki nu

konstrir, ant zordi ki existe, ek dime, ki ansam nu anvi kree.

Ala, enn-de pwin dan program LALIT: Nu program baze lor sanz lekonomi pu ki organiz li dan enn fason demokratik, e ki organiz lekonomi pu ki li sutenir bezwin *tu dimunn*, organiz lekonomi pu li pa rwinn planet, organiz lekonomi pu sekirite alimanter, organiz lekonomi pu ki ena lakaz pu tu dimunn, organiz lekonomi pu ki fam batи kapav al res enn kote. Nu ule organiz politik pu ki nu donn plis lavwa elektora pu kontrol Kabine Minis – ala seki reform elektoral ti devet vize. Nu pe viz, anparti enn kontrol direk par elektora lor Kabine Minis, ubyin enn kontrol atraver plis reprezentan dan enn Lezislatir buku pli gran e pli for ki asontur, kapav kontrol Kabine Minis. Nu ena enn program pu re-inifye nu pei, Chagos ek Diego Garcia finn kase depi leres pei par inperialist. Pu sa vinn vre, nu ena pu inform travayer dan Leta Zini ek Gran Bretayn lor sa baz la, e gayn zot kuma alye pu fer ferm baz la. Nu program viz pu limit represyon, e pu aret sa nuvo form sirveyans atraver ID Kart biometrik obligatwar.

Drwa de-vot pu travayer lot pei

E zordi nu pe lans enn nuvo demand, ki deza pe kumans gayn sutyin. Nu pe lans revandikasyon pu tu travayer depi lot pei ki pe travay Moris, gayn drwa de vot apre 3 a 6 mwa rezidans. Zot pey tax isi, zot viv ek travay isi, zot kree larises isi, zot bizin kapav vote isi. Dizon sa li 40,000 travayer, par la. Pareyman, tu sa 100,000 travayer Morisyin dan pei deor (dan Lafrans, Lairland, Litali, Langleter, Lostrali, Uganda, Sid Afrik, Mozambik, etc) bizin gayn drwa de vot kot zot pe travay laba. Ala nuvo demand nu pe lanse zordi. Si patron par-la anvi aste kuraz travay, li amenn u, abe u bizin gayn drwa de vot. Mem sa sel mizerab drwa-de-vot zot donn nu: al met lakra, enn fwa 5 an. Burzwazi fini kalkile,



Desin Escher, *Depth*, 1955

sa drwa enn fwa 5 an li paret ase, dan lepok normal, pu nu aksepte kontiyn sumet dan sa esklavaz modern la, vann nu kuraz.

Sistem existan li an-kriz

Alor, tusala pu dir, sa zur Fet Travay la, nu, dimunn ki travay pu viv, nu dan enn lepok lamar. Nu bizin rekonet ki nu dan lamar. Me, li osi enn lepok kriz ekonomik, ki pe menas sistem la limem. Remarke ki Navin Ramgoolam dan so dernye pwin depres, apre Clarisse House II, finn dir ki li ule enn lalyans ant 2 gran parti (PT ek MMM) parski bizin enn Guvernman for. Me, ki sa ule dir exakteman? Li ule dir ki Guvernman pu bizin ase for pu fors klas travayer sarye fardo sa kriz la. Li ule dir represyon. Alor, sistem kapitalis, li pe balote, afors li an-kriz. Pa zis isi, me osi o-nivo internasyonal. E sa sansasyon nu,

dimunn ki travay pu viv, dan enn "lamar", li pu anpire.

Me fode pa nu azir dan enn fason ki ogmant lamar, ubyin kot nu-mem nu al tas dan lamar, ubyin provok plis lamar – kuma donn kudme ar enn swadizan reform elektoral ubyin enn swadizan 2yem Republik, ki pli kont travayer ki stati ko.

Alor, nu program bizin viz pu ranvers sistem aktyel. Selman kumsa ki nu pu kapav re-inifye tu imin ansam. Nu pu kapav re-inifye selman kan nu finn tir sa sistem baze lor diferan klas sosyal, ki finn interonp sa ansyin limite ant imin ki ti existe pandan pre 200,000 an avan tu sa kasir ek fraktir ki mo finn koze.

Pu amenn sa kalite sanzman ki nu pe vize, nu fye lor klarte nu refleksyon – refleksyon dan nu langaz maternel. Nu fye lor koerans nu plan ubyin nu program,

enn konpreanson an-komin byin avanse. Nu fye osi lor enn lalit ki baze lor prinsip ek onete. Alor, nu mwayin amenn lalit, li liye ar nu bi. E pu li vinn vre, fode klas travayer, kuma enn klas, sekter par sekter, rekonet validite nu program. E sa, onivo internasyonal.

Internasyonalism pa zis enn slogan

E internasyonalism, pa nasyonalism li pa enn slogan, me plito enn prinsip esansyel pu nu proze politik vinn vre. E nu fer li enn proses vivan.

Par examp, dan dernye 2 semenn, LALIT finn ena 3 kontak internasyonal an personn. Rada Kistnasamy finn asiste Marxism 2014 dan Melbourne, Lostrali otur konze Pak an Avril. Rajni Lallah finn al rankontre 3 grup diferan Lareynion semenn dernye. Ek enn kamarad depi SWP Angleter ti vizit nu semenn dernyer.

Anplis, nu finn resevwar an kado apre linondasyon, depi dernye Fet Travay isi GRNW, par santenn liv klasik importan depi 7 diferan lorganizasyon politik deor. Ala internasyonalism dan lapratik!

E zordi nu pe lans sa nuvo demand: Drwa de vot pu tu travayer lot pei ki Moris! Drwa de vot pu tu travayer migran dan pei kot zot travay!



CLAVIS PRIMARY SCHOOL LANPRINT DIZITAL PU PREZANS "ILEGAL"

Dan enn 2yem zizman sok, Komiser Data Protection finn dimann lapolis pran aksyon kont ankor enn patron ki pe servi lanprint dizital pu prezans. Li ilegal, li dir. Sann fwa la, patron la se: Clavis Primary School, kot lor so Bord ena Philip Forget, sef La Sentinelle, ki ti sef MCB, e ki manb Ashok Subron so Blok 104. Klerman sa zizman la zenn Guvernman ki pe fors sitwayin pu donn lanprint dizital, kont so volonte, partu dan pei. Parfwa pe servi patrona pu dornt travayer, par tir lanprint lor sayt. Zizman dir, an sitan enn presedan: "This case illustrates the importance of respecting human rights' principles whilst processing fingerprints by the police, inter alia, the state. Therefore private employers cannot enjoy a lesser duty ... The test as shown above is a stringent one. In view of the fact that there are three main risks associated with the use of fingerprints namely identity fraud, purpose diversion and data breach occurrence, the random use of fingerprints cannot be allowed, and prosecution is advised against Respondent.". Enn sok siplemanter dan sa zizman la, se lefet ki Board Clavis dir, dan so defans: Lanprint asire ki tu dimunn prezans dan "A set of rooms where the whole school can gather and which is sealed off from the outside - recommended and partially financed by the American Embassy."

LALIT tir sapo Ms. Amanda Jones, ki finn lisansye depi Clavis, akoz li refiz donn so lanprint dizital, e ki finn ena kuraz purswiv so patron. So viktwar li byin importan, pu limem, e pu tu dimunn Moris.

RADA KISTNASAMY PREZANTENN PAPYE LOR

LALIT DIEGO GARCIA

Manb Komite Santral LALIT, Rada Kistnasamy, ti prezant enn papye dan Konferans Marxism 2014 ki *Socialist Alternative* finn organize ti derule ant le 17 Avril a le 20 Avril dan Melbourne, Lostrali. So papye ti lor lalit pu sosyalism dan Moris, avek enn laksan lor lalit pu ferm baz US lor Diego Garcia. Kumsa li enn swivi lezot diskur ki manb LALIT finn deza fer dan Lostrali, depi 2004, vini-mem. Finn osi ena reprezantan depi sa muvans politik dan *LALIT* so *International Action Conference* an 2010. Anfet sa Konferans, ki ti derule dan Kempes Liniversite Melbourne, finn rasanble ansam plizyer santenn militan: etidyan liniversite, manb bann parti sosyalis revolisyoner, militan sindikal, militan ki defann drwa Aborizenn ek tu dimunn ki pe amenn lalit kont tu form diskriminasyon.

Luvertir Konferans ki ti ena lye Zedi 17 Avril, 6:30 p.m. dan enn lasal kot ti ena plis ki 500 dimunn prezan. Ti ena diskur luvertir depi enn panel kot ti ena reprezantan Lostrali ek lezot pei onivo

Internasional. Parmi manb panel ti ena Diane Fieldes pu *Socialist Alternative* Lostrali, Ahmed Shawki depi *International Socialist Organization* dan Lamerik, Gilbert Acchar depi Lerop, Lex Wotton ki byin koni dan Lostrali pu so lalit pu drwa desandan Aborizenn. Ti ena osi lor panel militan sindikal dan Lostrali ek Philipinn.

3 zur ki finn swiv apre, finn ranpli ar bann diferan sesyon paralel, environ 30 differan sesyon par zur lor differan laspe lalit pu sosyalism baze lor analiz Marxist. A nerport ki moman, Rada Kistnasamy ti ena swa ant 5-6 differan sesyon, lor tu kalite size.

Finn ena bann sesyon interesan lor analiz trazektwar sulevman dan Lezip ek Lasiri, par examp, par rapor sirtu a lalit pu sosyalism. Finn ena osi sesyon lor mobilizasyon dan Lostrali, Philipinn, Lindonezi, anplis ki enn sesyon lor Moris. Sesyon lor Moris ti sirtu lor lalit kont baz militer Diego Garcia, me osi lor LALIT kuma enn lorganizasyon politik sosyalist revolisyoner ki angaze dan differan form lalit. Dan sesyon lor


Moris ti ena Morisyin ki etidyan dan Lostrali prezan, alor ti ena enn lintere partikilye dan papye Rada.

Finn ena osi sesyon interesan lor politik neoliberalism e so lefe lor sistem ledikasyon, osi byin ki enn sesyon dedye a kontribisyon Vygotsky(1896-1934) baze lor so lapros Marxist lor ledikasyon.

Anmentan sa 3 zur la, ti ena *School of Rebellion* ki ti dedye pu zanfan, fim radikal lor sosyete, morso kiltirel ek expo liv. Li ti enn veritab “hub” kiltirel ek sosyalist.

Pu LALIT, sikse sa konferans *Marxism 2014* dan enn pei ku-ma Lostrali, kot sistem kapitalist byin anrasine, finn vinn redonn lespwar dan sa lalit pu ranvers sistem kapitalist. Li enn sistem ki pe sirviv, malgre so bann kriz, sirviv tuzur lor ledo explwatasyon klas travayer; li enn sistem ki responsab pu lamizer lamas dimunn lor bul later, osi byin ki pu degradasyon drastik nu planet.

Konferans ti klotire Dimans swar avek sante *Linternasional* ki tu dimunn prezan ti dibut ek sante ansam.



ELEKSYON DAN LIND KI ENN NUVO GUVERNMAN B.J.P. REPREZANTE?

Apenn rezulta eleksyon dan Lind finn proklame, nu Premye Minis Ramgoolam finn kumans anvoy mesaz felisitasyon a Narendra Modi, finn mem anrezistre enn klip ki finn pase lor MBC ek lor Televizyon Lind Doordarshan. Klerman Ramgoolam finn fer tu sa demars la pu asire ki li gayn enn invitasyon pu seremoni instalasyon Modi kuma Premye Minis Lind, ek enn guvernman Bharatiya Janata Party (BJP).

Preokipasyon patrona e Guvernman lor Double Tax Avoidance Treaty

Dan lapres isi dan Moris, finn ena tu kalite spekilasyon lor ki sa nuvo Guvernman Lind ule dir pu Double Taxation Avoidance Agreement ant Moris ek Lind. An zeneral laplipar komanter dan lapres isi finn met lanfaz lor lefet ki BJP, par limem, san so bann alye dan NDA, finn gayn enn mazorite absoli dan Parlman Lind. Sa finn mem inspir Ramgoolam rekumans so bann rev pu enn guvernman Travayis, san okenn lalyans, san okenn beki, san okenn partaz: "Donn mwa gato la, les mo manz li tusel", li dir!

Baz ideolozik BJP

An zeneral pa finn ena okenn analiz kritik lor seki BJP ete dan larealite. Kan finn ena komanter lor sipoze "mirak ekonomik" dan Leta Gujarat su enn Chief Minister Modi, pa finn fer resortir ki kwasans ki finn ena dan sa Leta la, finn fer a traver enn politik ekonomik iltra-liberal ki finn benefisyek kapitalis, me ki pa finn benefisyek lamas dimunn ki anfet finn apovri; pa finn ena okenn amelyorasyon dan servis lasante, ledikasyon, sekirite sosyal. Etan done oryantasyon iltra-liberal BJP, li pa etonan ki klas kapitalist dan Lind ek dan diaspora Indyen partu dan lemond

finn sutenir finansyerman sa parti la, ek finn reazir trionfalman apre viktwar BJP: index lor laburs dan Lind finn ogmante par plis ki 10% depi ki li ti vinn kler ki BJP pe gayn eleksyon.

Baz dan RSS

Me kitwa pli gran mankman dan komanter ki finn ena apre viktwar BJP, se analizlor seki BJP limem reprezante an term ideolozi. BJP form parti dann enn muvans nasyonalist de drwat ek integris ki su kontrol RSS (Rashtriya Swayamsevak Sang).



RSS enn lorganizasyon inpe kuma Voice of Hindu isi dan Moris: li ena enn striktir organizasyon para-militer ek bann kan lantreman ek indoktrinasyon: dayer N.Modi, nuvo Premye Minis Lind, finn viv ek antrene dan enn sant RSS depi so zenes.

Dan lepase, enn mam RSS ki ti responsab pu asasina Mahatma Gandhi an 1948, se RSS ki ti deryer bagar kominal otur demolisyun Moske dan Ayodhya, dan masak dan Gujarat an 2002 kan Modi ti Chief Minister sa leta la. Se bann milis RSS ek sinpatizan BJP ki finn organiz kras lasal sinema kan zot pa dakor ek konteni serten fim. An zeneral, RSS ek so lel politik BJP, pa krwar dan enn leta sekilye pu Lind, zot ena enn laliyin integris ki an faver enn leta relizye pu Lind. Sa laspe ideolozi integris de drwat RSS ek BJP finn mem amenn zot sutenir muvman Zionist ek leta relizye dan Israel.

Kestyon ki poze se kifer elektora dan Lind finn donn enn

tel sutyen a BJP ki pu enn guvernman san enn veritab lopozisyon: Parti Congress ki ti diriz ansyen guvernman finn totalman lamine dan eleksyon, ek pa pu reprezant gransoz kuma lopozisyon, ni dan Parlman, ni andeor. Derut ki ansyen guvernman Congress finn sibir dan eleksyon finn rezulta sa ralantisman ekonomik ki Lind finn sibir swit a kriz finansyer ek resesyon ekonomik ki finn afekte lemond kapitalist depi 2007: mem Lasinn finn sibir sa ralantisman ekonomik la. Guvernman Congress ti osi perdi buku kredibilite atraver enn seri ka koripsyon ki finn expoze par kanpayn Hazare. Me se sirtu natir ladireksyon Congress ki finn fer enn gran parti elektora vir kont sa parti la: depi lindepandans Lind an 1947, Congress finn su kontrol dinastik lafami Nehru-Gandhi: Pandit Nehru, Indira Gandhi, Rajiv, Sonia, Rahul ek Priyanka. Sa striktir dinastik la finn anpes parti Congress evolye fas a enn lanvironnman ekonomik ek sosyal ki pe evolye byen vit.

Konklizyon

Dan Moris nu pu bizin byen vizilan par rapor a linflians ki sa nuvo guvernman BJP pu exerce lor sityasyon politik isi. Deza nu kone ki RSS ena lyen ek politisyen dan Moris, deza nu kone ki serten lorganizasyon kominalo-relizyez pran linspirasyon depi metod RSS, deza nu kone ki leta Indyen pe sey ranforsi so linfliyans militer dan Losean Indyen. Alor malgre tu seki dimunn apel bann relasyon istorik ek kiltirel ant Moris ek Lind, nu pa kapav inyor lefet ki enn guvernman BJP dan Lind, ek so ideolozi nasyonalist, integris, ek iltraliberal, kapav reprezant enn obstak a devlopman enn muvans sosyalist ek sekilye dan Moris.

DELEGASYON LALIT DAN LAREYNON MUVMAN INDEPANDANTIS BURZONE

Dan lespas enn wikenn, le 26-27 Avril 2014, LALIT finn zwenn 3 grup dan Lareynon pu etabli bann lyen ek esanz politik.

Seki interesan pu note seki sa 3 lorganizasyon ki nu finn zwenn ena enn analiz ki fer zot truv Lareynon kuma enn koloni e fas a sa, zot ena enn laliyn anti-inperialis. Sekife ki lor ishyu Chagos zot sutenir kanpayn LALIT a 100% lor 3 revandikasyon ki interlye (drwa de retur-kompansyon, fermfir baz ek suverenite). Dezyem pwin ki ena ankomin, se enn analiz realite azordi ki fer zot truv mod prodiksyon kapitalis ek imperialis kuma responsab sityasyon travayer dan Lareynon ek dan lezot pei.

Le 26 Avril, nu finn zwenn GTR (*Grup Trotskyist LaRenyon*) ki enn seksyon Lareynon dan 4em Internasional (seki zot dekrir kuma *re-proklame an 1993*). Zot explike ki se apre enn long peryod reflexion ki zot finn ariv definir zotmem kuma enn *Seksyon Lareynon* e non pa enn but dan seksyon

Lafrans; sinon, ti pu vedir zot pe kosyonn stati “Département” Lareynon. Antanki 2 parti politik internasionalis, nu finn desid pu kumans nu bann lyen par esanz lartik pu Revi. Sa bann kamarad ena enn publikasyon (Grup Travayer LaRenyon) ki enn tribinn lib degos qui sorti tule 2/3 mwa ek nu finn tom dakor pu pibliye seki paret interesan dan sakenn nu publikasyon.

LALIT finn usi zwenn enn zenn grup ki fek forme. Alabaz, sa regrupman finn kumanse par enn asosyasyon zenn emigre Lareynon ki res Lafrans an 2009. Grup la ankor existe dan Lafrans me li regrup usi Reyone ki exile dan Kanada, Gwadlup, Tinizi, etc. Lerla, kan sa bann exile finn return Lareynon depi 2-3 banane, zot finn kre zot organizasyon. Alabaz, se enn dimunn dan lasosyasyon Lafrans ki finn truv websayt LALIT ek finn kontakte nu. Zot usi ena enn publikasyon ki enn ‘Bulletin internationaliste’ kot zot pe lans enn lapel pu batir enn muvman antikolonial internasional

al. Zot ena 2 revandikasyon for: demilitariz Losean Indyen ek tir larme Franse depi Lafrik. Nu finn desid pu gard lyen ek esanz lartik.

Apre sa, nu finn rankont ‘*Lorganizasyon Popiler pou Libernout Pei*’ ki osi koni kuma ‘Muvman Indepandantis Reyone’, enn lorganizasyon avek lekel LALIT ti ena bann lyen dan bann lane ’90 atraver kamarad Serge Sinamalé ki finn malerezman desede. Sa nuvo organizasyon la asterla finn repran flanbo ek anim enn publikasyon ki apel ‘Fanal’ zisteman. Zot bi se pu “amenn konsyantizasyon ki bibron ki Lafrans donn Lareynon pa pu eternel”. Zot finn explik nu kimanyer zot ti ena enn manb ti pe amenn enn laliyn idantiter ek ki finn deza pran pozisyon xenofob kont dimunn Komor ki aster-la erezman nepli manb.

Tule trwa grup ti byen interesse pu konpran seki pe pase dan Moris, pu sutenir bann aksyon lor Chagos ek pu met LALIT okuran sitasyon politik Lareynon.

J.Y

Kreasyon Zordi

LAR KONT MIRAY APARTEID DAN PALESTINN



Sa desin la finn fer par artis grafitti Bangsy lor Miray Apartheid dan Palestinn. Li reprezent aspirasyon lepep Palestinyin pu laliberte fas a kolonizasyon ek lokipasyon militer Izrael.

An 2004 ti ena enn lamars par aktivis Palestinyin, Israelyin ek internasional pu proteste kont sa miray la. Militan LALIT ti prezan dan sa lamars la.

Lakur Siprem Israel ek Lakur Internasional Lahay finn dir ki sa miray la ilegal.

IKRENN: LAMERIK SO VILIN SEKRE AVEK SA PEI

70 BANANE KOLABORASYON NAZI

Amezir ki kriz pe propaze dan Ikrenn, nu pe truv danze ki intervansyon Larisi reprezante. Me anmemtan fode pa nu su-zestim sa menas byin grav ki sa konpozan fasist dan muvman nasyonalist Ikrenyin reprezante. Pu lekter Revi LALIT nu pe prezant enn rezime enn intervyu avek Russ Bellant, oter liv *Old Nazis, the New Right, and the Republican Party* (1991), par Paul Rosenberg pibliye 18 Mars, 2014.

Band Nazi

Listwar sa rezyon la, li enn listwar rivalite ant plizer band kriminel. Enn band Nazi parmi, ena enn long listwar konivans avek Leta Zini Lamerik. Sa konivans su tapi ki Russ Bellant expoze dan so liv *Old Nazis, The New Right And The Republican Party*. Dan so liv, Bellant anfet devwal kiksoz byin sokan: partisipasyon bann lider Nazi dan kanpayn prezidansyel George Bush (papa la) an 1988. Pandan dernye evennman dan Ikrenn, ena mansyon anpasan dan tu program TV, lartik, rapor radyo, etc. lor prezans bann “eleman Nazi” ek “kuran fasist” parmi sa bann nasyonalist Ikrenyin ki finn vinn opuvwar dan ku-deta Fevriye avek kudme USA ek Lerop. Me zame pena okenn explikasyon ubiyin komanter an detay lor ki ete sa bann eleman ek kuran Nazi ek fasist 1a. Intervyu Russ Bellant donn enn lekleraz lor sa bann eleman extrem drwat ki alinteryer bann lafors nasyonalist ki USA ek Lerop pe donn baking.

Organization of Ukrainian Nationalists [OUN], ubiyin enn brans koni kuma Bandera [OUN-B] ti zwe enn rol santral dan dernye ku-deta an Fevriye dan Ikrenn. Zot enn grup ki sorti depi parti Svoboda, ki finn okip

plizer post kle dan nuvo rezim interim. OUN ti forme dan bann lane 1920 apre enn split depi lezot grup dextrem drwat e dan bann lane 1930 kumans enn kanpayn asasinasyon ek terorist kont dimunn ki pa dakor ar zot.

Lalyans ar Adolf Hitler

Kan 2em Ger Mondyal aprose, zot fer enn lalyans avek puvar Nazi Adolf Hitler. Zot met dibut plizer band arme. Ena listwar dokimante lor kimanyer kan Lalmayn anvayir Linyon Sovyetik an Zin 1941, tutswit sa bann band arme organiz exekisyon plizer milye sitwayin kominote Zwif e likid popilasyon Polone dan lezot rezyon Ikrenn pandan lager.

Organization of Ukrainian Nationalists ziska zordi defann zot rol pandan lager e zot ti bak formasyon 14th Waffen SS Division, ki ti ena zis Ikrenyin e vinn enn divizyon arme su kontrol direk Lalmayn Nazi Adolf Hitler. Buku dimunn byin informe pa konn sa. Dan bann manifestasyon resan, lamars dan Kiev, dan konfrontasyon arme dan Ikrenn, ena ase buku manifestan ki ti pe anfet port insiyn ek brasar SS. Lider Svoboda uvertman fer bann komanter anti-Semitic.

Sutyin USA

Russ Bellant explike kimanyer Lamerik finn sutenir Parti Svoboda ek bann nasyonalist Ikrenyin. Sa lyin la dat depi 2em Ger Mondyal e li tini atraver servis sekre, servis espyonaz militer e apre, atraver CIA.

Yaroslav Stetsko, nimo 2 OUN pandan 2em Ger Mondyal, pran lidership an 1959. Se sa mem Stetsko ki an Zin 1941 siyn enn proklamasyon pu Ikrenn mars avek Adolf Hitler. Apre lager, Amerikin swazir li parmi bann lider kuma zot reprezantan pu larezyon. Apre lager, larne

Lamerik-Lerop desid pu regrup par dizenn milye ex-alye Hitler depi Les, setadir depi Laongri, Latvia, Lityuani, Bulgari, Rumania, Krwasi, Beloris dan bann kan, e osi depi Ikrenn. Bellant devwal bann rapor lor kimanyer OUN ti elimin so bann rival nasyonalist pu vinn lider inkonteste muvman nasyonalist Ikrenn pu ki Lamerik sponsor so loperasyon politik. An 1946 zot form Anti-Bolshevik Bloc of Nations, ABN, ek Stetsko vinn lider ziska li mor an 1986. Tusala su lezid USA.

Fasist Lalmayn

OUN ti lider enn lalyans multinasyonal ki ti azir su kontrol Lalmayn Nazi. Sa so nesans. E sa listwar la, ki tuzur maske dan preske tu lapres, apar sa enn-de mansyon anodin de “sertin kuran fasist” ubiyin “eleman Nazi”

Anfet, alinteryer Lamerik mem, Stetsko organiz bann swadizan reprezantan bann pep oprime dan Lerop de Les ek pei Baltik, oprime par URSS. Anfet zot ti gayn enn blenk chek pu reprezant lavwa bann nasyon dan Pak Varsovi; kan anfet zot ti reprezant eleman plis extrem drwat dan sa bann pei la, eleman fasist, eleman Nazi. Lamerik ti pe servi zot pu formant opozisyon kont Linyon Sovyetik.

Dan kumansman bann lane 50, su Prezidan Eisenhower, li in-krwayab me vre, USA fer amenn omwin 10,000 sa bann ex-manb muvman Nazi pu etablir dan Lamerik. Zot azir politikman dan Komite Parti Republikin ki vinn aktif pu sutenir kandida Republikin sak 4 an kan ena elekson Prezidansyel USA. Prezidan Nixon, par examp, an 1968 promet e fer zot vinn enn lel permanan Parti Republikin. Nixon swazir Laszlo Pasztor, kriminel de-ger ki

ti fer 5 an prizon dan Laongri an 1946, pu kontinye aktif, mem ant eleksyon, alinteryer Parti Republikin. Pasztor ti azan lyezon ant Parti Nazi ek Berlin, e se limem ki ti met ansarz pu organiz tu bann grup etnik pu emigre ver Lamerik, avek rezulta ki zis bann kolaborater Nazi ki ti pe rant dan Lamerik. Li enn trans listwar byin som.

Parti Republikin gran kupab

Russ Bellant, pandan resers pu ekrir so liv, ti al dan zot bann renyon dan Lamerik. Sa bann grup la, dan enn zot buklet 1984 sinye par prezidan National Committee Parti Republikin, zot fer eloz rezim pro-Nazi Ustashi dan Krwasi, sa-mem Ustashi notwar la, ki ti bril vivan aepre 750,000 dimunn dan bann kan dan Krwasi.

Li koz kimanyer Stetsko ti invite dine White House, avek Jeane Kirkpatrick (Ambasader Lamerik dan UN), Vis Presidan George Bush ek Presidan Reagan, kuma enn gran lider. Bush an 1988 met presyon politik pu aret investigasyon lor prezans bann kriminel de-ger Nazi dan Lamerik, alor sa finn tufe net.

Avek ekrulman Linyon Sovyetik an 1991, par milye sa bann emigre depi Ikrenn ki ti pe viv an USA, zot return dan Ikrenn e lezot pei dan Pak Varsovi. La, zot met parti politik dibut. Dan Ikrenn, zot rekonstitye grup veteran Waffen SS e vinn politikman aktif. Analyans avek Lamerik zot form parti politik deryer sa espes Revolisyon Oranz an 2004 e zot gayn eleksyon. Me, zot pa res opuvvar lontan, e ekrule dan skandal koripsyon, an 2010. An 2010, enn guvernman avek sutyin Larisi eli dan eleksyon. Lamerik ti sey par tu mwayin pu gard bann nasyonalist opuvvar, me zot perdi eleksyon. Lamerik ti ponp buku milyon dollar sak lane pu sey telegid politik dan Ikrenn atraver so nuvo stratezi ki ranplas ansyin stratezi CIA, setadir atraver *National Endowment for*

Democracy. Sa NED, li finans plizyer lorganizasyon Ikrenin. Lamerik ti pe fer, e pe kontiyn fer, mem zafer dan Larisi ek buku lezot pei dan lemond. Dan Moris, NED finans plizyer intelektyel, e petet seksyon lapres.

Lane dernyer, kan ena lokipasyon Independence Square dan Kiev, ti ena reporters Svoboda e zot lider dan parlman fer bann remark anti-semitik. Sa vedir zot tandans fasist finn persiste. Malgre zot listwar e zot afilyasyon uver ki devwal zot lyin avek Rezim Nazi dan Lalmayn, zot seytuf nerport ki prev lor zot listwar. Zot mem azir pu anpes purswit pu krim de-ger delapar zot manb.

Waffen SS so larme andeor Lamayn

Eski u ti kone ki Waffen SS ti enn larme miltinasyonal? Kifer liv listwar pa dir ki bann Nazi Ikrenin e Ongrwa e Latvya, zot tu konplis dan zot pei pu extermminn par milyon sitwayin kominate Zwif u ko-nasyonalist ki ti pa ti dakor avek zot lor isyu lager? Kifer pa devwal zot rol kuma kriminel de-ger, atraver Les Lerop an antye? Sa bann fe istorik la kasyet. Buku dimunn pa mem kone ki sa fenomenn la ti deza existe.

Russ Bellant kritik Lamerik pu so politik etranzer dan Lerop, dan Lamerik Latinn, e dan Lafrik, e li expos Parti Republikin pu so rol extrem, e Parti Demokrat pu lefet ki zame li pa chalenj sa politik la. Li importan dan kad sa lartik lor Ikrenn. Anfet, le 23 Fevriye 2014, amezir ki vyolans anti-gouverman ti pe ogmante dan Ikrenn, finn ena enn ku-deta kont parlman, kot finn destitye Prezidan Yanukovych ki ti eli. Ti nom Oleksandr Turchynov, Spiker, pu asir enn interim.

Interdiksyon Langaz Ris

Deswit finn interdi langaz Ris*, enn langaz ki buku dimunn Ikrenn koze. Lamerik ti anfet telegid sa ku-deta dan Ikrenn ki ranvers Prezidan Viktor Yanukovych, dan

so travay kontinyel pu mat Larisi so linflians zeopolitik ek militer. Depi kumansman kriz, Lamerik ek Lerop finn exprim sutyin a manifestan anti-gouverman Ikrenn. Manifestasyon ti dezenere an vyolans extrem ek konfrontasyon avek larme. E zot pe menas aksyon militer NATO. Tansyon finn anfet ogmante ant Lamerik-Lerop ek Larisi, kan le 16 Mars 2014, Krime dan enn referenndum finn vot masivman an faver integrasyon dan Federasyon Larisi. Asterla ena muvman dan Les ek Sid Ikrenn pu separasyon depi Ikrenn, ek enn eleksyon zeneral pe derule dan sirkonstans byin difisil. Enn espes nuvo Lager Frwad paret pe re-pran nesans.

Surs: Lekter Revi Lalit kapav lir orizinal intervyu onnlayn <http://fpif.org/seven-decades-nazi-collaboration-americas-dirty-little-ukraine-secret/>. Intervyu inn osi pibliye dan *The Spokesman* nimero 124.

* So landime destitisyon Prezidan eli Viktor Yanukovych, Parlman Ikrenn (Verkhovna Rada) aboli lalwa 2012 lor politik langaz. Sa lalwa ti permet bann rezyon pu adopte enn dezyem langaz kuma langaz ofisyel si 10% populasyon sa reyon la koz langaz la. Ena 13 lor 27 rezyon, sirtu dan Les Ikrenn, ki ti adopte langaz Ris kuma dezyem langaz ofisyel. Ena 2 rezyon dan Lwes Ikrenn ki ti swazir langaz Rumanyin ek Ongrwa kom zot 2em langaz ofisyel.



PREV LOR ENN TES NIKLEER IZRAELYEN

The South Atlantic Flash, li enn temwayaz enn "insider" dan Guvernman Lamerik; Leonard Weiss, ki rankonte kuma pandan plis ki 30an, aster la, Guvernman Lamerik, *ki* li su bann parti Demokrat u Republikin finn e pe kontinye, delibereman, kasyet enn tes nikleer klandestin ki ti ena lye dan Losean Indyin. Kisannla ti fer tes la? Gran alye USA, Izrael.

Satelite detekte tes nikleer

Oter la introdir kuma dan lane '63, Leta Zini dan kad enn trete, ti lans bann satelite ki apel "Vela" pu detekte bann tes nikleer klandestin. Sa bann satelite la ti sipoze res an servis enn sertin letan presi me enn ladan "Vela 6911" finn res aktif pli lontan e le 22 septam 1979 li finn detekte enn flash lalimyer. Form sa flas lalimyer la ti resamble a enn explozyon nikleer. Byen vit, Leta Zini finn lans enn resers lor lezot surs, apart "Vela 6911", *ki* ti kapav korobor sa bann done la ek konfirm (u pa) enn tes nikleer klandestin. De sa bann lezot surs la (Laboratwar Resers Naval ek Obzervatwar Arecibo) ti, anfet, konfirme ki finn bel-e-byen ena enn tes nikleer. Antretan, ladministrasyon Prezidan Carter finn kumans pans lor implikasyon politik ki enn tel tes nikleer kapav amene sirtu ki Carter, a lepok, ti baz so kanpayn ek so program prezidansyel lor desarmaman.

Supson Sid Afrik Apartheid

Dan enn premye tan, ti ena supson ki se Sid Afrik ki ti fer sa tes klandestin la me byen vit sa pa finn tini larut akoz program Sid Afrik pa ti sifizaman avanse ek se lerla, *ki* Izrael rant an senn. Lefet ki Izrael ti rant an senn finn konplik sitiasyon politik plis pu ladministrasyon Carter, *ki* ti truv li dan enn dilem pu met Izrael akoz parski si li ti fer sa: premyerman, ti pu ena bann impak

byen negatif atraver lemond Arab ek dezyeman, sa ti pu antrav negosyasyon dan Moyen Orian. Anplis desela, pa ti kapav pran bann mezir pinitiv anver Izrael (kuma Lamerik ti fer pu Pakistan) parski sa ti pu deranz dyaspora Zwif, *ki* ti reprezent enn gran part elektora pu parti Demokrat ek Carter.

Alor, pu relas presyon politik, ladministrasyon Carter ti met anplas enn panel syantis; "Ruina Panel", pu determine ki sa flash lalimyer la ti vremem reprezante. A lepok, CBS news, ti raport lefet ki ladministrasyon ti pe gard sekre sa linformasyon kumkwa Izrael ek Sid Afrik pe travay ansam lor developman misil ki kapav servi ar zarm nikleer. Me dan rapor ofisyel, zame pa ti mansyonn Izrael. Ek se kumsa ki ladministrasyon Carter finn espere ki pu gayn enn explikasyon alternatif a enn sipoze tes nikleer, lor sa flash lalimyer la. E "Ruina Panel" finn, anfet, dan la realite donn enn explikasyon alternatif kuma ladministrasyon Carter ti pe atann. Alor ki, preske, an mem tan, Laboratwar Resers Naval li, ti osi fer enn rapor lor sa flash lalimyer e *ki* zot, zot ti konfirme ki li koresponn a enn tes nikleer me ladministrasyon Carter finn swazir pu innyor sa rapor la.

Tewanyaz personel

Oter la rakonte kuma li mem, antan ki sef staf Sena so sukomite lor lenerzi ek proliferasyon nikleer ek Konseye pu Senater John H. Glenn, an 1981, finn sibir presyon extrem (depi Guvernman) kan lapres finn dimann li komant lor sa "flash lalimyer" la. Sa presyon politik extrem la finn konvink li premyerman, *ki* sa flash lalimyer la ti anfet enn tes nikleer e *ki* se Izrael, avek sutyen Sid Afrik, *ki* deryer sa. Dezyeman ki "Ruina Panel" ti met anplas par

Mezon Blans pu donn enn senaryo alternatif, pusov lamiz e ladministrasyon Carter e Izrael. Leonard Weiss, osi, servi John Hersh so liv: *The Samson Option*, pu donn plis prev ki sa flash lalimyer detekte par Vela 6911, *li* ti anfet enn tes nikleer Izraelyen. Dan so liv, John Hersh dir ki bann ex-ofisyen guvernman Izraelyen finn dir li ki Vela 6911 finn vremem detekte enn tes nikleer e *ki* sete trwazyem tes ki finn fer dan Losean Indyen. An 1997, asistan minis Zfer Etranzer Sid Afrik, Aziz Pahad, site par lagazet Izraelyen "Ha'aretz", ti konfirme ki levennman VELA ti reelman enn tes nikleer ek *ki* li ti enn kolaborasyon ant Izrael ek Sid Afrik.

Cover-up kontinye ziska zordi

Azordi, malgre lefet ki buku o-kad, syantis, etc, dan Lamerik, rekonet ki finn ena enn tes nikleer klandestin, an 1979, ni ladministrasyon Demokrat ni Republikin finn, zot, rekonet sa publikman. Rezon kifer Guvernman Lamerik pe kontinye kasyet pese Izrael se pu, anfet, sutenir so politik non-transparans lor so bann zafer nikleer, enn sutyen ki truv so lorizinn kan L.B.Johnson ti prezidan ek *ki* finn ranforsi su Nixon.

Kes "Vela" li pa ed Lamerik sirtu dan sa lepok kot zordi limem pe dimann transparans lezot pei kuma Lakore Dinor, Liran, Lasiri, etc, lor zot bann aktivite nikleer alor ki lot kote li pe kontinye res trankil lor bann aktivite nikleer enn lot pei; Izrael. Sa kalite politik pu kasyet ou byen indwir dimunn an erer (par bann sipoze panel, etc,) li al kont prinsip demokratik enn pei. Li enn taktik byen danzere. Li gran tan pu guvernman Lamerik rann so bann fayl publik e aret enn maskarad ki pe dire 30an aster la.

SK

JERRY LEONIDE:
PYANIST
EKSEPSYONEL


Ena enn albem eksepsyonal par enn pyanist Morisyin apel Jerry Leonide. Sa albem-la pe sorti Lafrans kot Jerry Leonide aster reste avek so madam ek so zanfan. Jerry Leonide ti sorti premye dan gran konpeti-syon festival jazz Montreux 2013. Li ti deza kalifye parmi 3 premye dan plizyer konpeti-syon internasional jazz avan dan Montreux ek Nottingham. Li enn pyanist eksepsyonal anterm so kapasite pu metriz langaz enn pyano pu exprim tu kalite lide mizikal.

Li finn resaman prepar so albem "The Key" (Lakle) kot li melanz ritmik sega-jazz ki pe devlope dan Moris. Dan so albem, ena lezot mizisyin Moris ki finn emigre: bater Jhonny Joseph ek basist Gino Chan-toiseau ki finn partisipe. Zot partisipasyon finn asir sa baz ritmik pros avek sega ki pe vinn enn partikilarite lamizik ki pe kree parmi mizisyin ki kontan jazz dan Moris.


ENN BANN MOMAN MO FINN PLI KONTAN PU EKUTE LOR YOUTUBE SE ENN EXTRE KONPETISYON NOTTINGHAM KOT KIKENN VENN ZWE ENN TEM PU JERRY LOR PYANO; ENN TEM 3 NOT KI LI BIZIN DEVLOPE SPONTANEMAN ANPLAS-ANPLAS. U KAPAV EKUT SA MERVEY-LA LOR YOUTUBE:

[www.youtube.com/
watch?v=L7uvMmhCA](http://www.youtube.com/watch?v=L7uvMmhCA)

Esperon ki nu pu gayn lokazyon ekut Jerry Leonide so albem osi byin ki get li zwe layv byinto.



Jabaljas ek Bulbak



Jabaljas: Dir mwa enn ku, Bulbak: ki ete sa zafer Rolls Royce ki mope tann dimunn koze partu?

Bulbak: Abe ki dimunn pe dir lor sa zafer la?

Jabaljas: Bann dimunn pe fann enn palab komkwa Navin Ramgoolam rul dan enn loto mark Rolls Royce ki kut plis ki 70 milyon rupi.

Bulbak: Kifer to dir sa enn palab, kapav et li vre.

Jabaljas: Non. Sirman enn palab ki lagazet pe fane pu anbaras PM. Dayer pa tomem ki ti dir mwa ki Navin Ramgoolam rul enn loto mark Arthur Martin.

Bulbak: Mo pa kapav finn dir twa sa. Arthur Martin se enn mark fur gaz pu lakwizinn. Kapav et to ule dir Aston Martin: sa enn loto parey kuma James Bond kondire dan so bann fim.

Jabaljas: Ale dizon Navin Ramgoolam rul dan enn Aston Martin: abe Rolls Royce, kot sa sorti? To pa truve palab mem sa.

Bulbak: Jabaljas, Aston Martin sa isi dan Moris, sa. Ki to krwar, kan Ramgoolam al Lond, li amenn so Aston Martin ar li. Laba li rul

dan enn Rolls Royce, parey kuma Larenn Elizabeth.

Jabaljas: Abe kitfwa kan li dan Lond, Larenn pret li so loto. Sa pa fer twa fyer, ki Larenn pret nu Premye Minis enn loto kumsa, pu li vakarne ek fer so bann demars.

Bulbak: Si loto Larenn sa, abe kifer so nimero RR10RAM?

Jabaljas: Get sa, Bulbak. Si ti ena kiksoz lus ladan, to pa krwar Lider Lopozisyon Bérenger ti pu expoz sa kare-kare.

Bulbak: Abe kitfwa lakoz samem Ramgoolam finn proroz Parlman. De tut fason, Bérenger, pur le moman, pe zwe rol enn lopozisyon Iwayal, an atandan ki lalyans fer.

Jabaljas: Dir seki to ule, me bizin ena laklas pu fer sa kalite zafer, rul dan enn Rolls Royce! Alor ki bann lagazet krwar: zis Gaeten Duval ki ti ena "Droit à L'Excès" kuma Gordon Gentil dir.

Bulbak: Li bon to finn fer mwa rapel sa: mo pa ti pe konpran kifer bann PMSD finn atas bandrol partu ek slogan: "Le Droit à L'Excès, c'est nous."